

ପ୍ରାକୃତ

প্রাক্তনী

শ্রীমুণীলকুমার দে

শ্রীশঙ্কর লাইব্রেরী

২০৪ কর্ণওয়ালিস ষ্ট্রীট

কলিকাতা

প্রথম সংস্করণ

শ্রাবণ, ১৩৪১

দুই টাকা

ত্ৰীপ্ৰবোধ নান কৰ্ত্তক ২৫।২, মোহন বাগান রো 'শনি-রঞ্জন প্রেস'
হইতে মুদ্রিত ও প্রকাশিত ।

ছায়ার কায়াটি ধরিয়া, মায়ার রথে
কতবার তুমি এসেছ গিয়েছ ফিরে,
মোনী মনের আঁধার-আড়াল পথে
বেদনা-বাহিনী বাসনার তীরে-তীরে ;
চিনি চিনি করি' চকিতে চিনেছি যারে,
চিনিয়া আবার হারায়ে খুঁজেছি তারে,
স্বপ্নের সেই কনক-কণিকাটিরে ।

হে মোর ক্ষণিকা রূপহীন-রূপে গড়া,
তবুও লুকাতে পারনি গোপন প্রাণে,
বারে-বারে তাই জীবনে দিয়েছ ধরা
শত-জনমের জাঙালের মাঝখানে ;
মানস-মৃগালে কামনার মঞ্জরী,
তিলে-তিলে তব তনুটি উঠেছে গড়ি',
ফুটেছে আবার আমার মুখের পানে ।

বরমাল্যটি পরায়ে স্বয়ম্বরে
কতবার তুমি হয়েছ সুখের সাথী,
অশ্রুধারায় ঝরেছ আমার তরে
কাটায়ে একেলা দীর্ঘ দুখের রাতি ;
মধুপরিহাসে কত-না সকালে সাঁঝে
চোখে জলভার দেখেছি হাসির মাঝে,
কত-না লীলায় লীলায়িত রূপ-ভাতি

দিয়েছ দীপ্ত চরণ-অলঙ্কারে
গৃহ-প্রাক্ষণ প্রাণ-মন মোর ভরি' ;
তুচ্ছ করিল কল্পনা-স্বর্গকে
আমার ধরণী তোমারে বন্ধে ধরি' ।
নিষ্কলঙ্ক শঙ্খ তোমার হাতে
বাজিল আবার শুভ কঙ্কণ সাথে,
জ্বলিল প্রদীপ স্নেহ-রসে থরথরি' ।

কতবার এলে তপোভঙ্গের তরে
জিনিয়া লইতে মোরে জীবনের মাঝে ;
কত তপোবনে একান্ত অস্তরে
আমারি ধেয়ানে জাগিলে তাপসী-সাজে ;
কতবার কেন এলে আর গেলে চলি'
ক্লান্তরে মোরে বাহুবন্ধনে ছলি' ?—
উন্মাদ-ব্যথা তাই ত বন্ধে বাজে ।

পথহারা তাই যুগে যুগে বারে-বারে
ফিরেছি ঘুরিয়া বেদনের নিবেদনে,
ধূসর উষর মর্শ্ব-মরুর পারে
কখনো গহন মনের বিজন বনে ।
ধ্যানের নয়নে উঠিয়াছ তাই জাগি' ;
বরেছি হাসিয়া মৃত্যুরে তোমা' লাগি' ;
কেঁদেছি বসিয়া স্বর্ণ-সিংহাসনে ।

জনমে জনমে, হে আমার প্রাক্তনী,
কত খেলা কর দেহে-দেহে সঞ্চরি',
সব সুখ-দুখ স্মৃতি-আশা মন্থনি'
তনুর পাশে অতনু সুষমা ভরি' ;
সে কায়ার মায়া জড়াল আমারে বুকে,
যমেরে তাড়াল,—কতবার হাসিমুখে
বসিল চিতায় আমার চরণ ধরি' ।

কতবার সেই দেহটি বেঁধেছি বুকে,
চোখের আড়ালে কেঁদেছি বিরহ-ছলে,
সুধাসুমধুর-বেদনা-বিধুর সুখে
তন্ময় হয়ে ফিরেছি এ ধরাতলে ;
স্বপ্নে সে-দেহ ধরিয়া ডুবন সারা
প্রলয়-পাগল ছুটেছি সকল-হারা,—
কখনো ভস্ম ভাসায়ে দিয়েছি জলে ।

হারায়ে হারায়ে ফিরে ফিরে পাই যারে
মরণের শ্রোতে জন্ম-বিবর্তনে,
চির-পিপাসায় তারি প্রেম বারে-বারে
অমৃতায়মান মরণের অমরণে ;
হারামুখখানি তাই বুঝি অমলিন
লুকায়ে আবার দেখা দেয় চিরদিন,
দ্বিগুণ সরস হরষের চুম্বনে ।

ওগো প্রাক্তনৌ, চিরকাল সাথে থাকি’
এসেছ আবার সব স্মৃতি অবগাহি’,—
অনেক কালের ভুলেছ সে-যাত্রা কি ?
চিরপুরাতন মোরে আর মনে নাহি ?
আনিয়াছি তাই আমি তব অমুরাগী
এ-জন্মে শুধু এই গান তোমা’ লাগি’
বিপুল পথের বিচিত্রকথা-বাহী !

সীতা

শকুন্তলা

উর্ধ্বশী

বাসবদত্তা

উমা

বসন্তসেনা

মহাশ্বেতা

পত্রলেখা

সীতা।

জানকী-বন্ধু, জানকী তোমার কাঁদে একাকিনী নির্বাসনে,—
কে আছে তোমার মতন নিঃশ্ব, বসিয়া রাজার সিংহাসনে ?

শৈশব হতে যৌবন-শেষ, গৃহে ও বনে

চিরবন্ধন যার সাথে তব দেহে ও মনে,
যার তরে তব জিগীষা জাগিল, সভয়ে সাগর ছাড়িল পথ,
ছুটিল স্বর্ণপুরীর তোরণ ভাঙি' ভিখারীর বিজয়-রথ ;

দেবালয়ে আজ সে-দেবতা নাই, চলে গেছে দূর দূরান্তরে,
সুবর্ণময়ী ব্যথার প্রতিমা পড়ে আছে শুধু রাজার ঘরে ।

রাজ্য ছিল না, পর্ণকুটারে ভিখারী তুমি,

সে-কুটার ছিল অনাবিল সুখস্বর্ণভূমি ;

সারা দিন পরে সন্ধ্যায় যবে ফিরিতে, শ্রান্ত তনু ও মন,
ছিল না শয্যা আধেক শূন্য, গৃহে ছিল তব গৃহের ধন ।

সার্থক হল লক্ষা-বিজয়, বধু লয়ে তুমি ফিরিলে ঘরে,
ধরণীর ভার ঘুচিল, তোমার জয়-সঙ্গীতে ভুবন ভরে ;

অরণ্যবাস চিরদিন তরে হয়েছে গত,

জানকীর মুখ দোহদ-খিল্ল লজ্জানত ;

সুখের পাত্র পূর্ণ করিয়া ছোঁয়ালে যখন অধরে আনি
দারুণ দৈব একটি আঘাতে করিল চূর্ণ পাত্রখানি ।

প্রাক্তন

গৃহে যে লক্ষ্মী বনে সহচরী কোথা আজ সেই রাজার রাণী,
দেহের মনের বিশ্রামভূমি, সারা জীবনের সে-কল্যাণী ;
কণ্ঠের সে যে বাহুবন্ধন তৃপ্তিলীন,
অস্তুরে সে যে শীতচন্দন চিরনবীন ;
আজো চোখে-চোখে রয়েছে সে-রূপ, অঙ্গে-অঙ্গে পরশ-রস,
ভাবের শূন্য শিখরে বসিয়া কেমনে নিজেরে করেছ বশ ?

নয়নে তোমার কেহ কোনোদিন দেখেনি অশ্রু, মমতাহীন !
জানকীর সাথে সুখ চলে গেছে,—চলে যায় তবু নিশীথ-দিন ;
অস্তুর-দাহ বহির মত ছুর্বিষহ,
তবুও একাকী হাসিমুখে তুমি সকলি সহ ;
নিখিল-জনের কল্যাণতরে নিজ হাতে কর বিসর্জন
নিজের যা' ছিল কল্যাণ তব, যে ছিল তোমার আপন জন ।

ঝড় হয়ে গেছে ছিন্ন কুসুম অযত্নে কোথা লুটায় বনে,—
দেবতা নহ ত, মাহুষের মত কেঁদেছ কি কভু সঙ্গোপনে ?
গৃহমন্দিরে নাই সে, গিয়েছে অনেক দিন,
মনোমন্দিরে আছে কি লুকায়ে ভাবনা-লীন ?
কেমনে দলেছ বৃদ্ধকু দেহে জীবন্ত প্রাণ, হে বলীয়ান,
শুধু মনোরথে ভাবনার পথে লভেছ গরিমা কি গরীয়ান ?

তব সম্মান গর্ভে ধরিয়া বনপথে সে ত চলিতে নারে,
 তোমা' ছাড়া তারে রক্ষা কে করে, এ বিপদে আর ডাকিবে কারে ?
 ধরার কণ্ঠা, সর্বসহা সে ধরার মত,
 আজ নিদারুণ তব নিগ্রহ-বজ্রাহত ;
 একদিন যার বিরহে, তোমার বিকল করুণ আর্তনাদ
 ধ্বনিত করেছে দশুক-বন,—কোথা আজ সেই প্রেমোন্মাদ !

সে যে রাজ-ঋষি জনকের স্মৃতা, জন্ম যজ্ঞভূমির 'পরে,
 ভাঙিয়া হেলায় হর-কাম্বুক জিনেছিলে যারে স্বয়ম্বরে ;
 সী'থিতে তোমার সোহাগ-সিঁদুর আদরে ধরি'
 তব রাজ্যের অশুভ কেমনে লইবে বরি' ?
 তোমা' ছাড়া আর জানে ত কিছু, তাই সে এখনো তোমারি লাগি'
 কল্যাণ যাচে, জনমে-জনমে পতিরূপে শুধু তোমারে মাগি' ।

থাম থাম, তব ফিরাও দণ্ড, ওগো নির্ভুর দণ্ডধর,
 দোষীর লাগিয়া শাসন রাজ্যের, নির্দোষী সে ত স্বতন্তর ;
 সোনার অঙ্গ পুড়িল না যার বহ্নিদাহে,
 হে রাজন, আজ কি দহনে আর পোড়াবে তাহে ?
 রাজ্যের ধর্ম্ম ঢাকিবে কেমনে মানুষের এই অগৌরব ?
 যশোধন তুমি, এর চেয়ে হীন অপযশ আর কি সম্ভব ?

প্রাণ নী

জীবনেরে করি' মরণ-অধিক, হৃদয়েরে করি' আশান-ভূমি,
যাহা সুন্দর, তার বৃকে বৃষ্টি সত্যের শূল হানিবে তুমি ?
কামনার তাই কালকূটে তব কণ্ঠ নীল,
ভাব-তরঙ্গ মাথায় তোমার নৃত্যশীল ;
অরূপের ধ্যানে রূপেরে তেয়োগি', পীযুষ-পিয়াস তুচ্ছ করি'
হের মৃত্যুর কি অমৃত রূপ ভাব-নিমগ্ন নয়ন ভরি' ?

প্রাণের যজ্ঞে দেহ নাই, শুধু সোনার প্রতিমা কেমনে তব
হরিল নয়ন, ধরিয়া মূরতি মমতাবিহীন কি অভিনব ?
তবু আপনার প্রাণের পদ্য উপাড়ি' ধরি',
চেতনারে নহে, বেদনারে নিলে বরণ করি' ;
সত্যের লাগি', সত্যসন্ধ, করিলে তুচ্ছ রাজ্যসুখ,—
রাজ্যের লাগি' রাজার মতন বরিলে সূচির বিরহ-দুখ ।

নবান নৃপতি প্রবীণ রাজ্যে, রঘু-দিলীপের বংশধর,
প্রজাপালকের কঠিন ধর্ম করিল তোমারে কঠিনতর ;
প্রাণসম প্রিয়া, তার প্রতি তুমি করুণাহীন,
আপনার প্রতি তার চেয়ে বৃষ্টি আরো কঠিন ;
মনস্বী তুমি সহিবে কেমনে সবিতার কুলে কলুষ-লেখা,
ফুলের মতন শুভ্র সে-প্রেমে বিশ্বের ক্রুর নখের রেখা ।

রাজকুলবধু, পুত্র-জননী, সহধর্মিণী, রামের রাণী,
 নহে তার তরে শুধু হাসি-খেলা,—নির্বাক হোক প্রেমের বাণী !
 রাম যে অভাগা, ললাটে তাহার সুখ ত নাই,
 বনে একাকিনী কাঁদে অভাগিনী জানকী তাই ;
 ক্ষুণ্ণ হবে না প্রজার কামনা, হোক সুখী শুধু এ ধরাতল,—
 থাক্ বৃকে গুট বৃকের বেদনা, চোখে অশ্রুত চোখের জল ।

অদৃষ্ট শুধু হাসিল !—একদা শ্লথ হল তব বজ্রমুঠি,
 বিশ্ববিজয়ী রাজার অশ্ব ধরিল সাহসে কে শিশু ছুঁটি ?
 যে-মুখের ক্ষণ-দরশ হৃদয় নিত্য যাচে,
 কে রচিল ওই যুগল-পদ্য তাহারি ছাঁচে ?
 তাপস-বালকে কে শিখাল কবে রামের করুণ চরিত-কথা
 সহসা বাপ্পে ঢাকিল নয়ন,—পুরাতন ক্ষতে নূতন ব্যথা ।

বক্ষের তলে এত বড় প্রাণ যার, সে কেমনে নয়ন মুদি'
 ধরণীর রূপ-সরণী ত্যজিবে, দেহের নিয়তি নিয়ত রুধি' ?
 ধেয়াইয়া শুধু মানসের মায়া উর্দ্ধমুখে
 ধরা নাহি পড়ে কামনার কায়া রিক্ত বৃকে ;
 রুদ্ধ রোদন হাহা করে কার একটু সরস পরশ লাগি',
 কার বিগলিত-অশ্রু-ললিত মুখের একটু দরশ মাগি' ?

প্রাঙ্গণ

ব্যথায় বিষ্ময় নহ তুমি, তবু কেবল ব্যথার বিলাস তরে
চলনি কল্ললোকের অলোক নিরালোক পথে গরবভরে ;
পাথর-নিথর বুকের আড়ালে দীপ্ত-বিভা
লুকালে তরল অনল-উৎস রাত্রি দিবা ;
সেই দিতে পারে জগত-জনের লাগিয়া শ্রামল বন্ধ পাতি'
যে রাখে চাপিয়া গোপনে আপন বুকের জ্বালাটি দিবস-রাতি !

তবু সে ত আর ফিরিল না ঘরে,—একবার তুমি কাঁদায়ে যারে
বিদায় দিয়েছ, হে দৃঢ়কল্প, এখন কেমনে ফিরাবে তারে ?
পুরাতন সুখ ফিরে না ত আর চলিয়া গেলে,
সে মুখের মত আর কোনো মুখ নাহি ত মেলে ;
ওগো উপবাসী উদাসী, কঠোর মুঠিতে মলিন বুকের মালা
ঝরে পড়ে, তারে জীয়াবে কেমনে, জুড়াবে শুষ্ক চোখের জ্বালা ?

জগতের মহাযজ্ঞে জ্বালিয়া আপনি আপন-আহুতি-শিখা,
কে পারে পরিতে দীপ্ত ললাটে দাহ-অবশেষ ভস্মটীকা !
মর্শ্মবিজয়ী নির্মম ওগো মর্শ্মাহত,
নিত্যমরণে করেছ বরণ বীরের মত ;
প্রাণ আছে যার সেই দিতে পারে নিঃশেষে নিজ প্রাণের হবি,
যে করেছে জয় জীবনের, তার অমৃত গরল সমান সবি ।

দেবতার মত স্থির-গৌরবে এসনি নামিয়া স্বর্গ হ'তে,
মানুষের মত ধরেছ জীবন সুখদুঃখময় চেতন-শ্রোতে ;
মানুষের সেই অস্থি-চর্ম কুধা-আলয়,
মানুষের সেই বুদ্ধি-ধর্ম কামনাময়,
ভেঙে-চুরে তবু সে-মরজন্ম অমর তোমার মহিমা ধরে ;
মানুষের রূপে আসে না দেবতা, দেবতার রূপ মানুষ ধরে ।

হে গৃহ-তাপস, স্বার্থবিনাশী, সুখদুঃখজয়ী শক্তিমান,
যুগ-যুগ ধরি' জগৎ তোমাবে করেছে পূজার অর্ঘ্যদান ;
মানুষের মত রিক্ত জীবনে সহিয়া সব,
দেবতার মত লভেছ মরণে কি গৌরব ?
বেদনার সেই গুঢ় ইতিহাস প্রাণ-রণ-রক্ত বুকের তলে
পূজার পুষ্পে ঢেকেছে কি সব, মুছেছে সীতার অশ্রুজলে ?

शकुन्तला

এতদিন পরে, হে রাজনু, আজ পড়িল কি মনে তারে,
রাজসভাতলে নয়নের জলে বিদায় দিয়েছ যারে ?

প্রাণের নিকষে সে-সোনার দাগ
ফুটিল আবার ধরি' নব রাগ ?
অলিয়া যে-শিখা নিভেছে বিন্মরণের ডম্বভারে
হল সে আবার দ্বিগুণ দীপ্ত নিয়তির ফুৎকারে ?

পড়িল কি মনে সেই মুখখানি অক্ষর কুয়াসায়,
আরো স্মন্দর মিলনের চেয়ে বিরহের পিপাসায় ?
পুরাতন, তবু পুরাতন নয়,
চিরনূতনের নব পরিচয় ;
মুছে-মুছে যেন কিরে-কিরে কোটে শরভের বরষায়
নিত্য-অলোক আলোকের লেখা নির্ভরে নিরাশায় ।

জীবিতরূপিণী জায়া আজ হল স্বপ্নের সজিনী,
তনুতটে আর উছলে না তার রূপের মন্দাকিনী ।
বিবাহের শুভ হোমধুমভার
করেনি অরুণ আঁধি ছ'টি তার,
তবু সে-আঁধিরে নিমেষে কখন তব আঁধি নিল চিনি'
সে বুঝি তোমার চিরজনমের মানস-সীমন্তিনী !

প্রা ক্ত নী

জননী তাহার মোহিনী মেনকা কামরূপা অঙ্গরা,
কল্পলোকের কামনায় যার নিটোল তলুটি গড়া ;
স্বর্গের রূপ-অর্থের ছল
দৃষ্ট তাপসে করিল পাগল,
সুর-তরুণীর তনুর মৃণালে মঞ্জরী মনোহরা
ফুটিল তোমারি লাগিয়া লীলার লাবণ্য-মন্দিরা ।

স্বর্গ-লীলার স্বর্ণলতিকা, তবু ধরণীর সনে
বাঁধা ছিল তার তনুর তন্ত্রী বেদনার মুচ্ছনে ;
তরু-মিথুনের মাধবী-মিলন
চঞ্চল করে যার দেহ-মন,
যৌবন যার বাঁধা নাহি পড়ে বঙ্কল-বন্ধনে,
নব অমুরাগ অমৃতায়মান যার রূপ-উপবনে ।

বিটপ-কোমল বাহু দু'টি তার, অঙ্গে-অঙ্গে ঝরে
নব বসন্তে লোভনীয় শোভা মঞ্জরি' ধরে ধরে ;
অধরে মঞ্জু কিশলয়-রাগ,
বুকে মধুময় সুরভি পরাগ,
বল্লীর মত বল্লী-বিতানে দাঁড়াল সে ক্ষণতরে,
নবমালিকাটি সহকারে যেথা নব আলোষে ধরে ।

রুদ্ধ আবাসে বদ্ধ বাতাসে রাজার প্রমোদ-বনে
যত গরবিণী উজ্জান-লতা গুমরে সজোপনে ;

অলকের পাশে বলকে না তার

দীপ-উজ্জ্বল হীরকের হার,—

সে যে মমতার নব সোমলতা ধরণীর তপোবনে,
দেবহুগ্ধ চিত্তনার ধারা বেদনার নন্দনে ।

ঘটের স্তম্ভ এনেছে বহিয়া তরুশিশুদের তরে,
শম্পের লাগি' মৃগশিশুগুলি পায়ে-পায়ে খেলা করে ;

কোথা তরুতলে গর্ভের ভার

বহিতে পারে না মৃগবধু আর ;

বিহরে কোথায় হংস-মিথুন নদীসৈকত'পরে ;

তরু-কোটরের শুকশিশুমুখে নীবারের কণা ঝরে ।

ঘটসেচনের অমলকণা এখনো কপোলে ভাসে,
লোহ-ফুলের পাণ্ডুর রেণু মুখে তার মুছে আসে ;

রক্ত কোমল ছু'টি করতল

ফুটে আছে যেন রক্তকমল,

এখনো লগ্ন কানের শিরীষ প্লথ-কুস্তল-পাশে,

এখনো থামেনি বন্ধ-বেপথু ঘনতর নিঃশ্বাসে ।

প্রাণ নী

তোমার প্রাণের স্বর্ণকমল সে-রূপরশ্মিরাগে
পঞ্চেন্দ্রিয়-পর্ণ বিধারি' বসন্তপ্রাতে জাগে ;
সঞ্চিত মধু অধরে তাহার
লাঞ্ছিত করে অলি বার-বার,—
কোথা পৌরব, তাপস-তনয়া তোমার শরণ মাগে ;
কে জানে কখন তবু অপাঙ্গে লজ্জার লেখা লাগে ।

চকিতে হল সে-চোখ ছ'টি নত, তবু সহকার-তলে
দাঁড়াল ফিরিয়া, বন্ধল-বাস শাখায় বাঁধায়ে ছলে ;
কুশ-অঙ্কুর বি ধিল ছ'পায়,
ছ'আঁখি কেবল ফিরে-ফিরে চায় ;
কণ্ঠ-মৃণালে ঈষৎ-বলিত ললিত মুখোৎপলে
ফুটিল হাসির অরুণ-কিরণ সলজ্জ কুতূহলে ।

দৃষ্টিতে রচে বন্দন-মালা নয়ন-ইন্দীবরে,
হাসিতে কুড়ায় একরাশি ফুল কুন্দ-মুখীর ধরে ;
পরম অতিথি প্রাণ-বল্লভ,—
প্রসারিত করি' বাহু-পল্লব
বিগলিত-শ্বেদ বুকের অর্ঘ্যে পূর্ণকলস ভরে ;
আপন তমুতে তবী রচিল মঙ্গল তার তরে ।

তবু, মহারাজ, একি হল আজ,—শাস্ত মালিনীতীরে
 উঠে উদ্ধত জন-কোলাহল তপোবন-ভূমি ঘিরে ;
 বকলগুলি বৃক্ষশাখায়,
 নগরের ধূলি ছেয়ে গেল তায় ;
 তব তুরগের খুরহত রেণু মন্দিরে মন্দিরে
 পড়িল আসিয়া, শলভের মত, আশ্রমতরুশিরে ।

কোথা হতে আজ মত্ত বারণ তপোবনে ছুটে আসে,
 আঁখি-চঞ্চল হরিণের দল পলাইয়া যায় ত্রাসে ;
 শ্রামল শাস্তি উটজ-ভূমির
 ভেঙে-চুরে দেয় ভঙ্গ-অধীর,
 চরণে টানিয়া ব্রততী-বলয় জড়ায় আপন কঁাসে ;
 আর তপোবন-মধ্য-সায়রে পদ্যটি নাহি ভাসে ।

দাঁড়ালে না তুমি ছুয়ারে আসিয়া কণেক দ্বিধার ভরে,
 পৌরুষ আর যৌবন শুধু জেগেছিল অন্তরে ;
 বলীয়ান্ তব বিপুল হৃদয়
 বাঙ্কিত যাহা করেছে বিজয়,
 কোনোদিন তাহে নাহি সংশয় ; বন্ধের পঙ্করে
 ছিল প্রাণ তাই প্রেমের পাত্র ধরিলে অধর'পরে ।

প্রাণ নী

নিঃশেষে যাহা করেছিলে পান অধীর অধরে ধরি',
সব প্রাণ দিয়ে একটি মধুর চুম্বনে নিলে ভরি',
হে প্রেমিক, সে কি অমৃতের রস ?
এনেছিল শুধু হাসির হরষ ?
ছিল না তাপের তাপের পরশ ?—তাই আঁখিজলে ঝরি'
এতদিনে বুঝি জুড়ালে জীবন, অমর মরণে মরি' ?

পৌরব কভু ভুল নাহি করে ?—ভুল ক'রে ভালবেসে
কাঁদিয়া কাঁদায়ে, দিয়েছ নিয়েছ এতদিনে নিঃশেষে ।
সে ছিল বিলাস, ছিল না বেদনা ;
ছিল অনুভূতি, ছিল না চেতনা ;
নিজেরে হারায়ে পেয়েছ নিজেরে, অজানারে জানা-শেষে ;
কণ্ঠে গরল ধরিয়া চলেছ অমৃতের উদ্দেশে ।

সেদিন আপন স্বপনে অলস ছিলে অচেতন-সুখে,
কঠোর দৈব তাই অভিশাপ-বজ্র হানিল বৃকে ;
আগুন যাহারে করেছে পরশ
সেই জানে শুধু জ্বালায় হরষ ;
ভুল করিবার অধিকারে আজ বাসনা-বহ্নিমুখে
লভেছ দিব্য দহন-দীপ্তি সুখ-হুঃসহ হুখে ।

কণ-মিলনের উপবনে যারে পেয়েছিলে দেহে-মনে
 হারামুখ তার আগে অনিবার বিরহের ভপোবনে ;
 বাঁধি' বাহুডোরে, নিখর নয়ন
 যে-রূপের রাগ করিল চয়ন,
 মিশে গেল সেই কামনার কায় স্বপ্নের ছায়াসনে ;
 কিরিবে না সে কি আর কোনোদিন দর্শনে স্পর্শনে ?

ইন্দুপাণ্ডু ফৌমবসনে অবগুণ্ঠনে ঢাকা
 অক্ষুট সেই দেহের দীপ্তি আজো আছে চোখে আঁকা ;
 অঙ্গে তাহার দোহদ-চিহ্ন,
 পথের ক্লাস্তি করেনি খিন্ন ;
 সরল নয়নে ঝরে না গরল, কটাক্ষ নহে বাঁকা ;
 করুণ কাতর মুখখানি, তবু কত যেন মধুমাখা ।

উঠেছিল বুঝি সারা বনভূমি সেই বিদায়ের কণে
 শিহরি' অলখে কোন্ অকথিত শব্দের কম্পনে ।
 ধূমনিরুদ্ধ যদিও নয়ন
 লভেছিল হবি তবু হতাশন,—
 তবে কেন আজ সহসা বজ্র ক্ষুরে নবনীল ঘনে ?
 হরাধিরোহিণী আশার লভিকা লুটায় ধুলার সনে ।

প্রাণ নী

হায় পুরুষের পুরুষ ভাষণ, সব চেয়ে লাগে প্রাণে
শঠতার সেই ক্রুর পরিহাস—বেদনায় ছুরি হানে ;
অপমান সাথে দিলে অপবাদ,
অপরাধী হয়ে ধর অপরাধ ;
ক্রুটি-কুটিল দীপ্ত নয়নে ধিক্কারে অভিমানে,
অমরীর নহে, ঋষির কণ্ঠা চাহিল তোমার পানে ।

আর্য্যপুত্র অনার্য্য হল রাজার সিংহাসনে,—
পৌরব, তব গৌরব কোথা গেল সে-সম্বোধনে ?
সেই প্রীতি ধরে এই রীতি আজ,
তবে আর মিছে স্বরণে কি কাজ ?
ব্যথার মূল্যে বিকায়েছে মোহ, অনিত্য-নন্দনে
ছল্লভ যাহা পড়িল না ধরা সুলভের বন্ধনে ।

আপনারে তাই নিগ্রহ করি' তোমার প্রত্যাদেশে
তাপস-তনয়া কি-তপের লাগি' চলে গেল কোন্ দেশে ।
সোমলতা নয়, সে যে শমীলতা,
যজ্ঞ-সমিধ্, বৃকে গুঢ় ব্যথা ;
পূর্ব্বরাগের প্রভাতের তারা, দিনের দহন-শেষে
ফুটিবে না আর শাস্তিমগন সন্ধ্যাগগনে হেসে ?

চিনিলে না তারে, তাই চলে গেল,—তবু কেন বারে-বারে
অজানার ব্যথা নিগুচ আঘাত করে মর্মের দ্বারে ?

যা'-কিছু রম্য, যা'-কিছু মধুর

করে কেন আজ হৃদয় বিধুর ?

কত জনমের চির-বিশ্মৃত পরিচয় বুঝি তারে
বিহ্বল করে ভাব-স্নিবিড় বেদনার হাহাকারে ।

যে-নয়ন তুমি ফিরালে সেদিন হাসি' অবজ্ঞাভরে
সে-নয়নে আজ আঁধার নেমেছে, অবিরল ধারা ঝরে ;

অকরণ তুমি দেখনি সেদিন

মুখখানি মুক হুঃখ-মলিন,

আঁখির পদ্ম মথিত নিবিড় অঙ্কুর নির্ঝরে,—

তাই চোখে তব সেই নির্ঝর, মুখে কথা নাহি সরে ।

স্মৃতির শিখায় স্মৃতির প্রদীপ জ্বালিয়া আরতি করি'
অবোধ হৃদয় আশ্বাস মাগে অদৃশ্য পায়ে পড়ি' ।

অনাদরে ঝরি' মুকুল মিলায়,

তবু অগোচর গন্ধ বিলায় ;

অঙ্গুরী তার ফিরে এল, তবু কোথা সেই স্মারী ?

গুপ্ত নাম জপি' কাটেনা ত আর বিরহের বিভাবরী ।

প্রা ক নী

তাই রূপরস-পরশ মাগিয়া বিরহের তীরে-তীরে
অনন্দের আনন্দের লাগি' কাঁদিয়া কাঁদিয়া ফিরে ;
বিরহের স্নেহটি বেড়িয়া অপার
বিরহে বাসনা করে হাহাকার ;
ফুলকুমল শকুমল সে জাগে আজ আঁখিনীরে
একবেণীধরা পাণ্ডু-অধরা বিরহের মন্দিরে ।

কোন তপোবনে আবার তাহার হেরিবে সে-মুখখানি,
পরিহরি' সব বাসনা-দম্ভ নিজেরে ধন্য মানি' ;
অধরে রবে না রোষের স্ফুরণ,
জলে ধুয়ে মুছে স্বচ্ছ নয়ন,
শুধু হৃ'জনার হৃদয় হৃ'জনে কবে ল'বে সন্ধানি' ?
মর্তের প্রিয়া হবে কি আবার স্বর্গের কল্যাণী ?

হৃ'জনার বুঝি ভাব-বন্ধন আবার নূতন করি'
বাঁধিবে স্নেহ হৃ'টি শিশুকর পরশের রসে ভরি' ;
হৃ'জনে চুমিয়া সে-মুখকমল
হবে হৃ'জনার নয়ন সজল,
শিশু-অঙ্গের ধুলার পরশ আপন অঙ্গে ধরি' ;
পরিণত হবে শরভের ফলে বসন্ত-মঞ্জরী ।

ଉତ୍ତରୀ

কোথায় বনে বনে পাগল হয়ে ভ্রমিছে পুরুরবা একা,
আকাশে আজো বুঝি উর্বশীর নয়ন ছ'টি বার দেখা ;
প্রথম উদাসম গেছে সে চলি', তবুও নবনীল মেঘে
পদ্মছায়াঘন সজল আঁধি এখনো আছে বুঝি জেগে ।

মেঘের প্রাবৃটের সুদীর-ছায়া নেমেছে আজ চারিধারে,
কানন, প্রাস্তর, নদীর তীর ঢেকেছে নব বারিধারে ;
ছেয়েছে শ্রামলিমা গগন-সীমা, মেঘের গুরু গরজনে
আর্দ্র উত্তরোল বাদল-বায়ু উচ্ছ্বসিছে কণে কণে ।

ভিমির-সুনিবিড় বিরহ-মায়া নেমেছে হৃদয়ের পারে,
অশ্রুধারে কত আর্দ্রনাদ গুমরি' ওঠে বারে-বারে ;
ঘিরেছে যেন তার স্নেহের লীলা শতেক রূপে ছল-ছল
শ্রামল সমারোহে বাসনাঘন ব্যথার ভারে চঞ্চল ।

কেতক-তটভূয়ে কাঁপিছে ছায়া, কাঁপিছে আলো কালো জলে,
আকুল হয়ে কত বকুল বারে সজল তীর-তৃণতলে ;
কলাপী-কলরবে রিজন বনে বাসনা-ব্যাকুলতা জাগে,
নয়নে বুঝি আজ মেঘের যত অভিন্ন অঙ্গন লাগে ।

প্রা ক্ত নী

অরুণরাগহীন মলিন দিন, কদমরেণু বনে বনে
ঝরিছে অশরণ বেদনা যেন আঁখির ঘন-বরিষণে ;
চমকে চপলার চকিত আলো, গগনে আঁগুনের রেখা,
শ্রামল বসনের আঁচলে যেন ঝলকে কনকের লেখা ।

বরষা-বীথিকার যুথিকা-বাস উতল বায়ে ভেসে আসে,
নয়ননীরে তার ধৌত যেন ব্যথাটি বহে নিঃশ্বাসে ;
আকাশ বেয়ে বুঝি অঝোরে ঝরে মনের জনহীন বনে
স্তনের হার হতে মুকুতা-ধারা অঙ্ক-মুকুতার সনে ।

রণিত-মনোহর বাদলধারা-ধ্বনিত ঘনবনমাঝে
চকিত চরণের চপল সুরে মায়ার মঞ্জীর বাজে ;
স্তবক-ভার-নত লতার দেহে পূর্ণ তম্বু তার কোটে,
সোহাগ-সুরভিত পরশ যেন বাতাসে সরসিয়া ওঠে

জায়া সে নিষ্ঠুর, পবনসম তাহারে ধরা নাহি যায়,
পরশে তার তবু প্রাণের বাঁশি ফুকরি' ওঠে উভয়ায় ;
দেবতা সে যে আজ মমতাহীন—বুকে কি আছে কোনো দাগ ?
নিমেষহীন আজ নয়ন তার, সেখা কি কোটে স্নেহরাগ ?

প্রথম দিনে যবে জীবনমাঝে মানবীরূপে উর্কশী
 আসিল, নীহারিকা-কুহেলি হতে তারার দীপ্তিতে খসি',
 আলোকে পুলকিত নগ্ন তনু ফুটিল আকাশের ফলে
 নিখিল-যৌবন পূর্ণ হয়ে একটি যেন শতরূপে ।

মর্ত-বাসনার মলয়-বায় শিহরি' কাঁপি' চারিপাশে
 সে-রূপশতদলে মূরছি' পড়ে ধরার নব মধুমাসে,
 আবারি' সোহাগের আবেশে তারে বসনসম রহে ঘিরি',
 চরণে, মুখে, বুকে, কটির তটে আদর-আগ্রহে ফিরি' ।

সেদিন পড়ে মনে যেদিন আসি' বাহর পাশে দিল ধরা
 অতনু-কম্পিত তনুটি তার, হৃথের মত স্থখে গড়া ;
 ঢাকিয়া দিল ঝরি' আকুল করি' মেঘের মত কালো কেশ,
 অধরে ছিল শুধু সুরস সুরা—হ'ত না চুহনে শেষ ।

সকল দেহ-মন মথিত করি' কাঁপিয়া বুকে নিষ্ঠুর
 সোহাগে পাকে-পাকে রাগের রসে করিল বুক শতচূর ;
 যেমন রাক্ষসী সিংহনীর ক্ষুভিয়া শতবার টুটে,
 যেমন মধুমাসে অধীর বায়ু দলিয়া ফুলবন লুটে ।

প্রাণ নী

পুলকে আনি' নব জীবন, তবু মরণসম ভালবাসা
নিমেষে হরি' লয় নিখিল প্রাণ, প্রাণের যত আশা ভাষা ;
প্রাণের সাথে দেহ হরিয়া লয়, লজ্জা দেহ হতে হরে,
লজ্জা-সাথে লয় লজ্জাবাস, লুপ্ত করি' চরাচরে।

মগ্ন ছু'টি প্রাণ নগ্ন যেন অপার আকাশের তলে,
সরমহীন সুখে কুণ্ঠাহীন কামনা শুধু উচ্ছলে ;
হাস্ত ক্রন্দন দিবস নিশা মিশিয়া যায় একাকারে,
পলকসম কাটে একটি যুগ, পলক যুগসম বাড়ে।

দেহের বন্ধন দেহের সাথে প্রাণের দৃঢ় বন্ধনে
নিবিড় হয়ে ছিল জীবন-মোহে তৃষার চির-গ্রন্থনে ;
আজ সে-বন্ধন ছিঁড়িয়া গেছে চেতনা-স্পন্দন-সাথে,
লুটায় ধূল্যামাঝে দেহের ভার প্রাণের আলোহীন রাতে।

কণেক বিহরি' সে তমুর তটে চলিয়া গেল সুরপুরে,
উধলে উন্মাদ-আবেগ তাই হৃদয়-অনুধি জুড়ে ;
ফুটিল ইন্দ্রিয়-পদ্মে কেন অরূপ সে-রূপের রেখা ?
দেহের ভঙ্গুর জলদে কেন ত্রিদিব-তড়িতের লেখা ?

ভুবন-ভবনে সে আসিল কেন প্রাণের পরিধির মাঝে
 স্বর্গ-স্বপ্নের শূন্য হতে মর্ত-মমতার সাজে ?
 ধরার রাগে-রসে ধরার রূপে তরুণ তম্বুখানি গড়া,—
 মরের প্রেমে কেন দিল সে দেখা অমরা হতে অঙ্গরা ?

নহে সে ধরণীর, ধরিল যারে অধীর পুরুষবা বৃকে
 জীবনলীলা-মাঝে দিবস-রাতি লভিয়া দুঃখে ও সুখে ?
 কোথা সে-দেবলোক অলোক-পথে, পলক যেথা নাহি পড়ে,
 কায়াটি ছায়াহীন, বিদেহ স্নেহ, নয়ন যেথা নাহি ঝরে !

পিছনে সন্মুখে তিমিররাশি, মধ্যে ভুবনের দীপ ;
 বেড়িয়া অজ্ঞাত জলধি বহে, মধ্যে জীবনের দ্বীপ ;
 রূপের নির্মাণ অরূপ হতে, আঁধার-মাঝে এই আলো,
 মরণ-মাঝে ক্ষণজন্ম-বর লেগেছে তাই এত ভালো ।

ছয়টি ঋতু হেথা ফুলে ও ফলে ভরেছে কান্তির ডালি,
 সূর্য্য শশী তারা আশিস্-আলো রেখেছে দিনরাত আলি' ;
 আকাশ মুখপানে চাহিয়া রয়, ধরণী লয় তুলে বৃকে,
 বিশ্ব-প্রাঙ্গণে পলকতরে জীবন জাগে সুখে-দুখে ।

প্রাণ নী

মাটির দীপ দেহ, স্নেহের রসে বাসনা-বর্ষিকা ধরি'
প্রাণের প্রমুদিত প্রভাটি অলে মরণ-বায়ে থরথরি' ;
থাক্ না ধুমায়িত জ্বালা ও কালি, ভস্ম দাহ-অবশেষে,
দীপ্তি তবু তার দহন-রসে আঁধারে ফুটে ওঠে হেসে ।

তামসী রাত্রির যাত্রী এসে আয়ুর আলো-কণাটিরে
ক্ষণেক ধরি' লভে নাম ও রূপ তনুর তীর্থের তীরে ;
মহিমা ধরে চোখে মহীর কায়্যা, মায়ার মমতার মেলা,
পরশ, পরিমল, প্রীতির গীতি, বর্ণ-স্বর্ণের খেলা ।

ধরণী আছে ওগো তেমনি আজো সুবাসে সুসমায় জাগি',
দিবস-রজনীর আঁধার-আলো জাগিয়া আছে তোমা' লাগি' ;
আবার মর্ন্তের মাধুরীমাঝে লক্ষ-জীব-কলরবে
এসে গো নিশীথের নিলয় হতে আলোক-ছায়া-উৎসবে ।

বন্ধে আজো সেই পরশ জাগে, চক্ষে চাহনিটি আঁকা,
প্রাণের পরিমল ভাসিছে প্রাণে, কণ্ঠরব কানে মাখা ;
মরমে মেদিনীর মমতা-মণি—কে চাহে স্বর্ণের সূধা ?
শূন্যপানে চেয়ে শুক তালু,—আজো সে-দেহ, সেই কুধা ।

অনেক হাসিমুখ জীবন-ভীরে ছায়ার মত আসে যায়,
তবুও তারি মাঝে একটি মুখ নয়ন খুঁজে নাহি পায় ;
একটি মুরতি সে অনেক দিনে গড়িয়া ওঠে ছায়ালোকে,
তুলনা নাহি তার ভুবনমাঝে,—আর সে পড়িবে না চোখে ?

বিরহ-জলধর অশ্রুমাখা প্রাণের প্রাস্তর 'পরে
নিবিড় নিরাতপ ব্যর্থতার ব্যথার নির্ঝরে ঝরে ;
জন্ম-পদের সুরভিমাঝে এস গো এস সঞ্চরি',
আবার উর্ব্বার উর্ব্বাশীর মমতা-মূর্ত্তিটি ধরি' ।

বাসবদন্তা।

ফাগুনের ফুলবন

ভরি' কত ফুল ফুটালে উদয়ে, হে উদার উদয়ন ?
মেলিয়াছে কত কিশোরী কলিকা আঁখি সৌরভ-নভ,
প্রফুট-দল কত মঞ্জরী গৌরব-উন্নত ?
যামিনীর কত কামিনী-কুসুম, প্রভাতের শেফালিকা,
দিনের দীপ্ত সূর্যামুখী ও সন্ধ্যার মল্লিকা ?

এনেছে তোমার তরে

ফুল-জনমের যত লঘুলীলা নিতাস্ত নির্ভরে ;
ছেয়েছে তোমার সকল অঙ্গ পরাগ-অঙ্গরাগে,
স্বাসে অধীর করেছে মদির ফুলতন্তু-অন্তরাগে ;
মানসের মধু নিঙাড়ি' নিঙাড়ি' ধরেছে অধর-দলে,
ঝরেছে আকুল আঁখির শিশিরে তোমার চরণতলে

রূপের সে-উপবনে

কোকিল-আলাপে কেকা-কলরবে কপোত-কুহর-মনে
ভাসিয়া বেড়ায় সুখ-গুঞ্জর ফুলদল-অন্তরে
বীণাবেণুতানে মদ-মস্বর মদনের মস্তুরে ;
উছলিয়া উঠে প্রীতির প্লাবন কায়া-কূলে মর্মরি',
বক্ষশিলায় লক্ষ লীলায় নিরবধি নির্ঝরি' ।

প্রাণ নী

কতবার গুঞ্জরি'

সরস পরশে তব প্রাণ-বীণা উঠিয়াছে ধরধরি' ;
কত নামহারা নায়িকা তোমার—কোথা আজ তারা গত ?
কত মাধবিকা, বকুলাবলিকা, ইন্দীবরিকা কত ;
বিচিত্র লীলা-হেলায় যাহারা যৌবন-উন্মদ
আঁকিল প্রাণের ফলকে আলোক-আঁধারের আলিপনা ।

প্রথম-মিলন-ভীত

মুগ্ধা কেহ সে পুলক-আকুলা চুমন-চমকিতা ;
ধ্বষ্ট তোমারে প্রগল্ভা কেহ বেঁধেছে মেখলাদামে
লীলা-উৎপলে আঘাত করেছে যৌবন-উদ্দামে ;
আদরিণী কেহ আধহাসি হেসে আধেক আঁখির ঠারে
গিয়েছে লুটায় বসনাঞ্চল চঞ্চল সঞ্চারে ।

কোপের সোহাগে ভরা

ভুরু বাঁকায়েছে ভাণ করি' কোনো ভামিনী ক্ষুরিতাধরা ;
বেণী-বিনাইয়া বেঁধেছে কবরী কেহ কত সযতনে,
পত্রলেখাটি এঁকেছে বক্ষে কল্লুরী-চন্দনে ;
কাজল-উজ্জল আঁখির প্রসাদে, হাসিটির অমুনয়ে
করেছে স্নিগ্ধ সারা প্রাণ কেহ স্নেহরস-সঞ্চয়ে ।

চেয়েছে প্রতীক্ষায়

কুসুম-আসনে কেহ অনিমেবে মণিময় বেদিকায় ;
চলেছে আঁধারে কেহ অভিসারে, তড়িত-চকিত-আঁধি,
তেয়াগি' অধীর পদ-মঞ্জীর, নীলবাসে তম্বু ঢাকি' ;
বিরহিণী কেহ বেপথু-বিধুর বাহুতে লয়েছে টানি',
বিছায়ে পূর্ণ পূর্ণিমা-রাতে গুহ্র আঁচলখানি ।

ছিল কত সবিলাস

বাগীজলকেলি, নৰ্ম্ম-বিনোদ, প্রমোদের পরিহাস,
মধুপান-সাথে ভুরুর ভঙ্গ মদকল-প্রলাপন,
শিখীর নৃত্য, কপোতের কেলি, সারিকার আলাপন,
মদনোৎসব, জ্যোৎস্না-জাগর, বনানীতে বিচরণ,
ঝুলনের মেলা, আবীরের খেলা, কদম্বফুল-রণ ।

কত নুপুরের ধ্বনি,

কটির প্রান্তে চপল মুখর মেখলার রণরণি,
কত এলোচুলে ফুলের গন্ধ, চক্কের অঞ্জন,
চারু-চরণের অরুণ-লাক্ষা, বক্কের চন্দন,
ললাটের তটে তিলকের লেখা, সীমস্তে অঞ্চল,
নীল অশ্বরে নীবির বন্ধ করে তোমা' চঞ্চল ।

প্রাণ নী

তব কাস্তারা আনে

ক্লাস্ত-কাস্ত মাধুরীটি শুধু পুলক-লোলূপ প্রাণে ;
খেলার হেলার বিলাসে অলস মনোজের মনোরথে
জীবন তোমার চলে চারুতার ফুল-সুকোমল পথে ;
প্রসাদে-বিষাদে, আলাপে-প্রলাপে, উচ্ছ্বাসে-উল্লাসে
বহে বাসনার ব্যথাটি বাতাসে নিঃসহ নিঃশ্বাসে ।

চাহি তব মুখপানে

তাহারা কেবল যৌবন-পুটে রূপ-উপহার আনে ;
ফুটিয়া তম্বুর তনিমা-বিলাসে বিলাইয়া সৌরভ
তিমিরে রৌদ্রে সহে হাসিমুখে সোহাগের ঢেউ সব ;
বহে বুকে শুধু বাসনার মধু ভক্তভৃঙ্গতরে,—
দিনটি ফুরালে বেদনা-বৃন্তে নীরবে ঝরিয়া পড়ে ।

মনে আছে সেই কবে

শীতের অস্ত্রে নব বসন্তে মদন-মহোৎসবে,
ঝরে অতম্বর তুণসঙ্গিনী সহকার-মঞ্জরী,
করে তারে যেন গরলদিক্ মধুকর সঞ্চরি',
বাসবদত্তা পুঞ্জিল তোমারে বসন্ত-মঞ্জলে
নবমাধবীর বীথির বিতানে অশোক-তরুর তলে ?

সারা কোশাঘী-পুরী
কাণ্ডনের কাগে অশোকের রাগে উঠেছিল বিচ্ছুরি' ;
নাগর-নাগরী রাজ-রথ্যায় ছুটে পীতবাস পরি'
কুঙ্কম-করে হাসির লহরে শৃঙ্গকে জল ভরি' ;
নৃত্যগীতের কল-উচ্ছ্বাস উছলে যমুনাতীরে,
মৃদু মৃদঙ্গ-মন্দিরা বাজে অনঙ্গ-মন্দিরে ।

সেই-সে প্রভাতকালে
কে তরুণী আসি' দাঁড়াল কখন বিটপী-অস্তুরালে ;
মদনোৎসবে মদনের মত বসেছিলে হাসিমুখে,
বাসবদত্তা অর্ঘ্যটি আনি' ধরেছিল সম্মুখে,—
কে আড়ালে থাকি' নমিল তোমারে দূর হতে জোড়-করে
প্রিয়দর্শন মকরকেতন ভাবিয়া ভক্তিভরে ?

ফুল-অঞ্জলি ভরি'
পূজিল তোমারে একান্তমনে দূর হতে সুন্দরী ;
কাঁপিল সহসা সকল অঙ্গ অনঙ্গ-শিহরণে—
সকল কামনা কামদেব বৃক্ষি পুরাল এতক্ষণে ;
তরুতলে তব মধুর মুরতি হেরিল আড়ালে থাকি',
নিল নিশ্চল হু'টি আঁখিতারা তব আঁখি হু'টি আঁকি' ।

প্রাক্তন

তরঙ্গী-নিমজ্জনে

পেয়ে তারে কবে বাসবদত্তা রাখিল আপন সনে ;
সিংহল-নরপতির তনয়া ছিল সে ভট্টারিকা,
সাতসাগরের মস্থন-ধন, নাম তার সাগরিকা ;
পরিচয় তার কেহ নাহি জানে—আসিল সাগরশ্রোতে,
বাসবদত্তা রাখিল তাহারে তোমার দৃষ্টি হ'তে ।

তুমি তাই কোনোদিন

দেখ নাই তারে, নিভূতে কোথায় তব অবরোধ-লীন ;
দৈব সেদিন প্রভাতে হাসিয়া কি ঘটাল নাহি জানি—
কোন্ দ্বীপ হ'তে সাগরের শ্রোতে কি রত্ন দিল আনি'
ভুবনে ভ্রমিছে মদন-শাসন—বিভ্রমী যৌবন—
কে এড়াবে তার ললিত লীলার নিষ্ঠুর নিপীড়ন ।

তাই বালা কত সহে,

হৃৎকণ্ঠ-জন-কামনা তাহার মনটি নিভূতে দহে ;
অনঙ্গ-লেখ লিখিয়া গোপনে কত সে লুকায়ে রাখে,
প্রাণে-আঁকা তব ছবিটি যতনে চিত্র-ফলকে আঁকে,—
যেন কামদেব কাম্য-মুরতি অশোক-তরুর তলে ;
সখী তার আঁকে তারি পাশে তারে রতিরূপে কত ছলে ।

রিক্ত রজনী জাগি'

কে জানে কত সে নিশুতি-শয়নে কেঁদেছিল তোমা' লাগি'
তুমি দেখিলে না, তুমি জানিলে না বুকে তার কত ব্যথা,
দাঁড়িয়ে আড়ালে বিটপীর তলে বহিল কি ব্যাকুলতা ;
ভাষাহীন সেই আশাহীন হুখে নিকুঞ্জবনে আসি'
মরণ শরণ করিল সে শেষে, গলে দিল লতাকাঁসী ।

সেদিন দৈব আনি'

দিয়েছিল তব করে তার সেই অঙ্কিত ছবিখানি ;
তাই গোধূলিতে নিভুতে আসিয়া তাহারি অশেষণে
হেরিলে তাহারে প্রথম সেদিন মরণ-আলিঙ্গনে ;
লতাকাঁস খুলি' বাহুপাশ তব জড়ালে কণ্ঠে তার—
তব আলোষে নূতন মরণে মরিল সে আর-বার ।

কখনো তোমার তরে

এত ফুল বুঝি তব ফুলবনে ফোটেনি একস্তরে ;
দেহে চম্পক, অধরে অশোক, নয়নে নীলোৎপল,
সরস উরসে যুগ্মপদ্ম, ভুঞ্জে কেতকের দল,—
কত অনর্থ পুষ্প-অর্ঘ্য অঙ্গে-অঙ্গে ফুটে'
দেহের মনের গুঢ় চেতনার বেদনাবদ্ধ টুটে ।

অস্তমেঘের মাঝে

কুপিতা-কামিনী-কপোলের রঙে ফোটে আলো সেই সঁাখে ;
সে-আলোকে হেরি' মুখখানি তার, চরাচর হল ভুল,—
কি সুধায় গড়া, সে-মুখের বুদ্ধি নাহি আর সমভুল ;
সহসা কখন বাসবদত্তা দাঁড়াল সেখানে আসি'—
অস্তমেঘের রঙটি তাহার কপোলে উঠিল ভাসি' ।

প্রাণহীন মুখে সুখী

ধূষ্ট ধূষ্ট তুমি চিরদিন বঞ্চনা-কৌতুকী ;
করি' জ্ঞান বাসবদত্তা চাহিল তোমার পানে,
তুমি দেখ শুধু—ফুলধনু সেথা নব ধনু যেন টানে ;
কোপ-কষায়িত কপোল-কাস্তি যেন রাঙা উৎপল,—
মানিনীর মান ভাঙাবার তরে হলে তুমি চঞ্চল ।

পড়িলে চরণতলে,

ভুলিয়াও তবু বাসবদত্তা ভুলিল না তব ছলে ;
কতবার তুমি সাধিলে সেদিন, তবু চাহিল না কিরে,
সব সুখ যেন ছ'পায়ে দলিয়া চলিয়া গেল সে ধীরে ।
হে সুখলুক, কোনোদিন কোনো দাগ নাহি ধরে প্রাণে-
তবু কেন আজ এতদিন পরে সে-স্মৃতিটি ব্যথা আনে ?

আরো একদিন কবে

দেখিলে কাহারে তড়াগের তীরে কৌমুদী-উৎসবে ;
রাজার কুমারী কোথা অরণ্যে ছিল সে ব্যাধের ঘরে,
সেনাপতি তারে লুঠিয়া সঁপিল বাসবদত্তা-করে ;
বনানীর ফুল হল প্রিয়া তব সেই প্রিয়দর্শিকা,—
হে লোল-চিন্ত, কোথা গেল তব সাগরের সাগরিকা ?

বনফুল-যৌতুক

আনিল আবার জীবনে নবীন পুলকের কৌতুক ।
হরকণ্ঠের ছ্যতিহর সেই সরসীর কালো জলে
হেরিলে যে-ছায়া ভাসে নয়নের নব-নীল শতদলে ;
লতার মতন স্তবকিনী তনু মধুপের মনোহরা,
অধরে কোমল কিশলয়-রাগ, বুকে শুধু মধু ভরা ।

বাসবদত্তা ভরে

প্রাসাদে তাহার প্রেক্ষাগৃহটি কত কলরবে ভরে ;
নূতন নাট্যে নামিল সেদিন হাসিগান-কোয়ারায়
নৃত্যানিপুণা প্রিয়দর্শিকা নায়িকার ভূমিকায় ;
উঠিল নৃপুর-নিব্বাণ-সনে বীণাতারে বঙ্কার,—
তুমি লুকাইয়া আসিলে সেথায় হেরিতে নৃত্য তার ।

প্রাঙ্গণ

শরদিন্দুর মত

মুখখানি তার হরষে সরস, অংস ঈষৎ-নত,
ক্ষীণ কটিতে ঘন নিতম্ব, সরল পদাঙ্গুলি,
লীলায়িত ভুজে নিবিড়-নক্স বক্ষ উঠিছে ছলি' ;
নত-উন্নত দেহটি উছসি' লঘুনৃত্যের ভরে
বিকশি' বিলসি' উলসি' উঠিল লাবণ্য থরে-থরে

রত্ন-অলঙ্কারে

শতদীপালোকে ঝলকে প্রত্ন তনু তার বারে-বারে ;
কবরী বেড়িয়া দোলে ফুলমালা হীরকের জ্বালা সাথে,
নূপুরের সনে বাজে কিক্কিণী, কঙ্কণ ছু'টি হাতে ;
তারি তালে-তালে উতলা তোমার মনটি সে-নর্ত্তনে
গোঁথে নিল বুঝি বক্ষে বলিত মুক্তাবলীর সনে ।

তুমি নায়কের বেশে

সখীগণ-সাথে মিশিয়া নামিলে রক্তভূমিতে এসে ;
জানিল না কেহ—প্রিয়দর্শিকা আর তার সখী ছাড়া,
প্রেম-অভিনয়ে তার সাথে তুমি হলে সেখা মাতোয়ারা ;
চোখে হাসিরাশি, অবগে কেবল গীতধারা উচ্ছলে,
রসে ভাসে দেহ দেহ-পুষ্পের পরশে ও পরিমলে ।

সে-রাগের রসাবেশ

সহসা ফুরাল, নিভিল প্রদীপ,—উৎসব হল শেষ ;
বাসবদত্তা চিনিল তোমারে, ফোড়ে ছুখে অভিমানে
জুঁকুটির গুণ টানিয়া আবার চাহিল তোমার পানে ;
আবার কপোল-পাটল-পর্ণে ফোটে রোষারুণ-রাগ,—
হে কিতব, তব প্রাণে কি তাহার পড়েছিল কোনো দাগ ?

চিরবসন্তবায়ু

কেটেছিল দিন বিলাস-বিলীন প্রমোদের প্রচ্ছায়ে ;
নয়নে বিহরে মায়া-মরীচিকা দিশাহারা-তৃষা-সনে,
হৃদয়ে শিহরে বাসনার শিখা স্মর-শর-অশরণে,
আজীবন তুমি আপনা-মগ্ন চাহনি তাহার পানে,
আহত করেছ কতবার তারে বঞ্চনা-অপমানে ।

তবু ক্ষমাশীল স্নেহে

জড়ায়ে ছিল সে তব প্রাণে মনে, তব দেহে আর গেহে ;
কত সাগরিকা, প্রিয়দর্শিকা এল আর গেল চ'লে,
প্রাণহীন তুমি কতবার তার প্রাণটি গিয়েছ দ'লে,—
তবু বরষায় শীতে কুয়াসায় জড়ায়ে লতার মত
শ্রামল বন্ধে জীবন তোমার বেঁধেছে সে অনাহত ।

প্রাণ নী

তুমি ত চাহনি ফিরে,
দেখনি তাহার স্নেহ-সৌরভ অলঙ্ক্যে ছিল ঘিরে ;
আনন্দ-লঘু লীলায় চলিলে উদ্গদ-যৌবনে,—
কত ফুল ফোটে, কত ফুল ঝরে বসন্ত-সমীরণে ;
সেও ত এমনি একটি কুসুম—আজ তাই সেও ঝরে,
এতদিন পরে তবে তার তরে প্রাণ কেন হাহা করে ?

সে কি চিরদিনতরে
গিয়াছে চলিয়া বাসবদত্তা চির-অভিমান-ভরে ?
যুত্যা আসিয়া গ্রাসিয়াছে তারে 'লাবাণকে' গৃহ-দাহে,-
চিরপুরাতন হারাধন তারে সবহারা আজ চাহে ।
মানস-সরসে ছিল যে-নলিনী নিভুতে নয়ন মেলি'
কেন অকরণ অনল-কুণ্ডে বিধি তারে দিল ফেলি' ?

তারি উত্তাপে যত
প্রমোদ-নিশির প্রগল্ভ সুখ, শুক ফুলের মত,
পড়িল খসিয়া একটি নিমেঘে, চোখ ভ'রে গেল জলে,
জাগিল বেদনা বেদনাবিহীন কঠিন হৃদয়ভলে ;
ধমকি' কখন্ ধেম্বে গেল ক্লট বাসনা-বাঁশরী-রাগ,
লুটাল ছিন্ন লতার মতন অসহায় অল্পরাগ ।

ছিল গৃহকোণে হারা

যে-রত্নদীপ, ছিল সে উজ্জলি' জীবন-সরণি সারা ;

পেয়ে কভু তারে চেননি, তাই কি হারায়ে চিনিলে তারে ?

রত্নের দীপ নিভে না, শুধু সে জ্বলিল অন্ধকারে ।

দেহের ছয়া'র অনেকে এসেছে সুখের আশাত করি',—

আজ এ কে এল বৃকের ভিতরে ছুখের নিখরে ধরি' ?

আজ তারে পড়ে মনে

যে ছিল নিরভিমানিনী দয়িতা সেই নবযৌবনে ;

হেমন্তে আজ হিম-জ্যোছনায় সুদূরের শশী ধরে,

উদিত সরস অফুট হরষ মুদিত মৌন ধরে ;

নিশির কুহেলি শিশির-যৌত আঁধারে আলোটি ঢাকে,

শুধু তন্মিল চন্দ্রিকামাখা আকুল আবেশ আঁকে ।

মনে ভেসে আসে সব

ভাবে অবগাহি' অতীতের সেই যৌবন-গৌরব ।

পিতা তার ছিল মহাতেজস্বী মহাসেন প্রত্যোত,

লুকাল বাহার খরতাপে যত রাজস্ব-খণ্ডোত ;

তুমি ছিলে তার প্রতিদ্বন্দ্বী, একদা বন্দী করি'

তোমা'রে কপট কৌশল রচি' আনিল প্রাসাদে ধরি' ।

প্রাঙ্গনী

ছিল রাজধানী তার
অবস্খীপুরী, তব যশোগীতি আজো ঘরে-ঘরে যার ;
রাখিল তোমারে বন্দী করিয়া সঙ্গীত-শালিকায়,
ছিল সাথী তব বীণাটি বুকের ; গবাক্স-জালিকায়
বসি' আন্মনে বাজাতে যখন, সুকরণ সুরগুলি
কার কানে পশি' প্রাণের ভিতর দিল বন্ধার তুলি' !

কতদিন বাতায়নে
বসিল চাহিয়া সুদূরের পানে নৃপসুতা আন্মনে ।
তুমি হলে তার বীণা-আচার্য্য ; তোমার বুকের বীণা
জাগিল পরম পরশে আবার তাহার অঙ্কলীনা ;
সেই অঙ্গুলি-গ্রহত প্রথম উঠেছিল মর্ম্মরি'
যে-সুরের ঢেউ, দূরের আভাসে আছে কি তা' সঞ্চরি' ?

গুরুদক্ষিণাতরে
ললিত কলায় প্রিয় শিষ্যা সে মর্ম্মের মধু ধরে ;
অবস্খী হতে হরিলে তাহারে, নিজের পুরীতে আনি'
আপনার পাশে বসায় আদরে করিলে তাহারে রাণী ;
সেই দিন হতে হল সে প্রাণের যুধীবন-বিহারিণী,—
আজ সে এসেছে স্মৃতির গহনে গোপন-সঞ্চারিণী ।

সে-দিন কি আছে মনে

যে-দিন তোমার অন্তর-গৃহে শব্দের নিঃস্বনে
 পশিল সে আসি' শুভ কলরবে বিবাহের চেলি পরি',
 হোমধুমারুণ নয়নে তরুণ সলজ্জ হাসি ধরি' ?
 কুন্দের মত কোমল দেহটি, সুধার সুধারা-মাখা
 সরমে সোহাগে চারু চাহনিটি আছে আজো প্রাণে আঁকা ?

তারপর কতদিন

প্রভাতে প্রদোষে কত হাসি-গান, কত সুখ সীমাহীন ;
 চোখে চোখে কত চাহনি-চমক, কানে কানে কত কথা,
 দেহে দেহে কত শিহরণ, আর মনে মনে কত ব্যথা ;
 কঙ্কণ ছু'টি ছু'হাতে, কেশের কিনারে কর্ণপূর,
 রক্তচরণে অলঙ্কারাগ, সীমন্তে সিন্দূর ।

যমুনার উপকূলে

সেই সব দিন তারপর তুমি একে একে গেলে ভুলে ;
 নিত্য-নূতন পুলকে বহিল প্রমোদের উদ্ভানে
 জীবন-নিব্বর মোহ-মন্ডর কামনার কলতানে ;
 আজ এ কি হল,—সে-সুখের শ্রোত ঠেকিল আচম্বিতে
 মরণের ক্রুর পাষাণ-সরণে ধমকিয়া সচকিতে ।

প্রা ক্ত নী

ভাঙি' হৃদয়ের বাঁধ

সেই শ্রোত হল বেদনা-বারিধি উত্তাল উন্মাদ ;
হাসিল সুদূর শশীলেখা ছুখ-অমাষামিনীর আড়ে,—
এমন হাসি ত হাসেনি কখনো সুখ-পূর্ণিমা-পারে ।
হাসায়েছ তারে, কাঁদায়েছ তারে আজীবন দিয়ে কাঁকি,
আজ সে তোমারে গেল কাঁকি দিয়ে, কাঁদাল আড়ালে থাকি'

তাই সান্ধনাহীন

বিরহের খর নিদাঘের দাহে হয়েছে দীর্ঘ দিন ;
কোথা সে শীতল-পরশ চরণ, সরস সিক্ত কেশ,
কোথা মায়াঘন ছায়া-সুকুমার শাস্ত দিবস-শেষ ;
প্রাণ-সিঁদুর ইন্দুর লেখা আর আসিবে না ফিরে,
কেবল সুদূর হাসিটি বিধুর ভাসিবে তিমির-তীরে ?

স্বপ্নের মায়াপথে

তাই সে আবার আসিল কি আজ স্মৃতির ছায়াপথে ?
নিরালাতে আসি' নিকুঞ্জে যবে শুয়েছিলে তুমি একা,
ছপূরে তখন নুপুরবিহীন চরণে দিল সে দেখা ?
অনলদহা প্রিয়া বুঝি আজ আবার সজোপনে
জাগিল নূতন নির্মল রূপে বেদনার হতাশনে ।

বুঝি নয়নের নীরে

ঝরা-জলধনু তনুর দীপ্তি ফুটিল স্পৃশি-তীরে ;
 বাতাসে তাহার কেশধূপবাস এখনো উদাস করে,
 এখনো দেহের সোহাগ-স্মরতি বুঝি আকুলিয়া ধরে ;
 মলিন মুখটি ফুটিল যেন সে কোন্ সকালের চাঁদ,
 কণ্ঠে করুণ দূর ভৈরবী ভাঙে ধৈর্যের বাঁধ ।

আবার ত ফিরে পায়

যা' হারায় লোকে,—মরমের মাঝে হারালে কি পাওয়া যায় ?
 তাই বুঝি আজ সায়াহ্ন-রাগ স্মৃতিতটে অবগাহি'
 রয়েছে হারানো পুরানো প্রভাত-স্বপনের পটে চাহি' ;
 হারায়েছে যাহা, তাহা কি আঁধারে ধুয়ে-মুছে অবশেষে
 হৃদয়-উদয়-অচলে আবার ফুটিয়া উঠিবে হেসে ?

প্রভাতের বহুরে

ডাকিছে রবির পূরবীর তান স্মরতি সাঁঝের স্মরে ;
 কোথা অগোচর চরণে মদির মায়ী-মঞ্জীর বাজে,
 ফোটে কি চপল কপোলের ছায়া অন্তমেঘের মাঝে ?
 আজ বিরহের গীত-শতদলে অতল মনের তলে
 ফেলেছে চরণ মরণে আবার স্মরণের নব ছলে ।

প্রাণ নী

আবার কি তার সনে

দেখা হবে নব-কল-উচ্ছল জীবনের ছায়াবনে ?
বৈধেছে প্রাণের শিথিল তন্ত্রী করুণা-কঠিন করে,
আজ এ নিবিড় বেদনার মীড় তারি সঙ্গীতে ভরে ;
কখনো কি আর তালে-তালে তার বাজাবে না কিঙ্কিণী ?
হবে না লীলার সঙ্গিনী আর নেপথ্য-রঙ্গিণী ?

উদ্ভদ মধুমাসে

বহিবে না আর বসন্ত-বায়ু ছরন্ত উল্লাসে ?
আকুলি' তাহার কণ্ঠ-কাকলি উঠিবে না আর জেগে,
ফুটিবে না আর হাসিটি চপল চুম্বনরাগ লেগে ?
আর কাটিবে না চল-চাহনিতে চঞ্চল বিভাবরী,
বেতসের মত বেপথু-উতল তনুখানি বুকে ধরি' ?

উমা

উমারে কাঁদায়ে ফিরায়ে দিয়েছ, অতি-অকরণ হে সন্ন্যাসী,
যে-দেবতা জাগে মনের পদ্মে তাহারে করিয়া ভস্মরাশি ;
পূজার পুষ্প এখনো রয়েছে বেদীর 'পরে
আপনি তুলিয়া আনিল যাহা সে তোমার তরে ;
প্রণতির কালে পড়িল খসিয়া নীল-অলকের যে-ফুলগুলি
এখনো তাদের সুবাস সুসমা লুপ্ত করেনি পথের ধূলি ।

বসন্তসাথে বসন্ত-সখা তপোবনে পশে অকালে আসি',
হ্যালোকে ভুলোকে পড়ে গেল সাড়া, মনে আর বনে ফুটিল হাসি ;
স্তবকিতা লতা ফুল-বিভূষণ-বিলাসে নতা
সাজিল গৌরী, বৃকে মধুময় সুরভি ব্যাথা,
আভরণ হল অঙ্গে অঙ্গে মুক্তার মত সিদ্ধুবার,
পদ্মরাগের মতন অশোক, সুবর্ণসম কর্ণিকার ।

মন্দাকিনীর পুষ্কর-বীজ যতনে শুকায়ে সূর্য্যকরে
অঙ্কমালাটি এনেছিল রচি' সর্প-বলয় করের তরে ;
চরণের দাগ এখনো রয়েছে পথের পাশে,
অঙ্গ-সুরভি এখনো তাহার বাতাসে ভাসে ;
অশ্রুসজ্জল সে দু'টি উজ্জল নয়নের মায়া গিয়েছে রেখে,
পক বিশ্বকলের মতন অধরের ছায়া আঁখিতে এঁকে ।

প্রাক্তন

এখনো ধ্বনিছে তব ছন্দার, আকাশে অমর অভয় মাগে,
তপোভঙ্গের রোষে কর্কশ ভ্রূভঙ্গ তব এখনো জাগে ;
এখনো হাসিছে পিশাচের দল রক্ত-আঁখি,
নীল নভোতল কালো হয়ে গেছে আঁধারে ঢাকি' ;
এখনো রতির ব্যথার বিলাপ ভুবন ছাপিয়া গগন ভরে,
পুরুষ-আকৃতি বিভূতির রেখা রয়েছে পড়িয়া ক্ষিতির 'পরে

সতী-দেহ লয়ে স্বক্কে একদা, হে দেহ-পাগল, সারা ভুবন
কেঁদে ফিরেছিলে, তাই বুঝি আজ দেহ-বিদ্বেশী তোমার মন ?
দেহ-দেউলের দেবতার দেহ, হে যতিরাজ,
কি কঠোর তব নিগ্রহ-দাহে দহিলে আজ ;
দেহ পুড়ে হয় ভস্ম যেথায়, ভালবাস সেই শ্মশান তুমি,—
ভস্ম-বিভূতি, দেহের ভস্মে করিবে এ ধরা শ্মশানভূমি ?

নিন্দিল রূপ সুল্লরী উমা আপন হৃদয়ে বিষাদভরে,
রূপে অহার্য্য বিরূপ যে তুমি,—রূপ সে ত নহে তোমার তরে ;
চির-অরূপের ধোয়ানে মগন, দিগম্বর,
বর্ণবিহীন মহাকাল তুমি শ্মশানচর ;
রূপ কেঁদে যায় অরূপের দ্বারে,—রূপসী ধরণী শিহরি' কাঁপে
ভাঙে যবে তার রূপের হৃদ্য তব সংহার-শূলের চাপে ।

হিম-আলয়ের বিবিক্ত মরু-শিখরে বসিয়া, হে ধ্যানলীন,
শিখেছ কি শুধু মরণ-মন্ত্র, মরণ-বিলাসী মমতাহীন ?

যোগনিমগ্ন নয়নে কি শুধু অনল জ্বলে ?

তাণ্ডব তব নিখিলের সুখ হু'পায়ে দলে ?—

কি ফল লভিলে করিয়া শুষ্ক শবের উপর অধিষ্ঠান ?

রূপ-সাগরের মন্থনে তুমি শুধু কালকূট করিলে পান ।

সুরভি-মাসের সুরভির স্রোতে তবু একদিন নয়ন মেলি'
কে জানে কখন বিশ্বের পানে চাহিলে, প্রাণের পাথর ঠেলি' ;

বিষজ্জর কণ্ঠ শুকাল সুধার তরে—

ভিখারী দৃষ্টি ধমকিল আসি' বিশ্বাধরে ;

ধ্যান পরিহরি' পলাইয়া দূরে, ওগো রূপ-ভীক, বাঁচিবে কিসে ?

চিরদিনতরে সব ধ্যানে তব সে-রূপের কণা গিয়েছে মিশে ।

ভেসে গেল বুঝি তপস্যা তব সেদিনের সেই স্রোতের মুখে,
উড়াল মন্ত মলয় তোমার সংযমরাশি কি কোঁতুকে ;

অশানবাহিনী তটিনী জটিল জটীর তলে

লুকাল কোথায় বীচি-বিভঙ্গ করুণ কলে ?

স্মরদর্শির শিখা ললাটিকা হল কি লুপ্ত স্মৃতিবশে ?

সন্ন্যাসী, তব করের করোটি ভরিয়া উঠিল কি মধুরসে ?

প্রাঙ্গণ

হে ঈশান, তব রুদ্র বিঘাণ আর জাগাল না প্রলয়-নাদ,
আবার মধুর ময়ূখ বিথারি' জটীর আড়ালে হাসিল চাঁদ ।
একটি মুখের এক নিমেষের মধুর স্মৃতি
ধ্যাননিমগ্ন নয়নে ভাসিয়া উঠিছে নিতি ;
বুঝি মদনের দাহ-অবশেষ ভস্মে এখনো অনল জ্বলে,
তারি উত্তাপে কি যেন অজানা বেদনা জাগিছে বুকের তলে ।

অষ্টার মনে উদিল যে-কাম সৃষ্টির প্রাতে প্রথম দিনে,
যারে বিশ্বের বাসনার রতি রূপরাগে রুধি' লইল জিনে',
পুষ্পমাসের সখা, পুষ্পের ধনুটি করে,
ধরণীর সুখ-সুখমা যাহার তনুটি গড়ে,
তাহারি বেদনা দেহের অতীত গুমরিছে আজ সকল দেহে,
সকল চিন্তে রতির বিলাপ জাগিছে চিন্ত-নিবিড় স্নেহে ।

তোমারি লাগিয়া অপর্ণা আজ হয়েছে তাপসী, হে তপোধন,
বন্ধলে বাঁধি' পীন পয়োধর, তব ভাবরসে বেঁধেছে মন ;
ললিতাঙ্গিনী জটায় ঢেকেছে নীল অলক,
উর্ধ্বে নিহিত দৃষ্টিতে তার নাহি পলক ;
লীলা-উৎপল নাহি আর হাতে, ধরেছে রুদ্র-অক্ষমালা
কুশ-অঙ্কুরে ক্ষত অঙ্গুলি,—তোমারি ধেয়ানে বিভোর বালা ।

যে তরুণ তনু করেছ তুচ্ছ, হের আজ তার কি আছে বাকি ?
বুঝি অতনুর তনুর ভস্মে তনিমাটি তার রেখেছে ঢাকি' ।

চরণ-কমলে অলস্ক-রাগ গিয়েছে মুছি',
সজল নয়নে কাজলের লেখা গিয়েছে ঘুচি' ;
কানে আর নাই কানের পদ্ম, অরুণিমা নাই সে-সুধাধরে
সৃষ্টি-বিলয় দৃষ্টি তোমার খেমেছিল যেথা ক্ষণেকতরে ।

রিক্তের সেই উগ্র দর্প কোথা গেল আজ, হে সন্ন্যাসী,
কোথা গজাজিন, পিনাক তোমার, কোথা তাণ্ডব, অট্টহাসি ?
শ্মশানের সাথী কোথা আজ সেই প্রেতের দল ?
কোথা বুকে জ্বালা, কণ্ঠে গরল, চোখে অনল ?
শিব হল বুঝি অশিব সে আজ, সুন্দর হল ভয়ঙ্কর,—
তাপসী প্রিয়ার লাগিয়া আবার ফিরে এলে তুমি, হে শঙ্কর ।

এতদিন পরে বুঝি আপনার সন্ধান পেলে আপন মনে,
বিশ্ব-সুধার কুধার পাত্র কে ধরিল হাতে সজোপনে ?
উমার সে-মুখ বিরহ-মলিন, বিলীন ধ্যানে—
বেদনা তাহার কি বেদনা আজ আনিল প্রাণে ?
স্মরজিৎ, আজ স্মরের গরলে কি রাগ আবার কণ্ঠে ঝরে ?
সে-তনুভস্মে, ভস্মভূষণ, তব তনু আজ কি শোভা ধরে ?

প্রাক্তনী

উমার অধরে ফুটিল আবার সলজ্জ হাসি মধুরতর,
বধূর দুকূলে তব গজাজিনে বাঁধিল গ্রন্থি কি সুন্দর !
সন্ন্যাসী, তব বন্ধের চিতাভস্মরাশি
হরিচন্দন-পত্রলেখায় মিশিল আসি' ;
তাণ্ডব সাথে লাস্ত মিশিল, হাস্ত মিশিল অট্টহাসে,
ভীমরূপে মিশে রূপের লক্ষ্মী, কঠোরে কোমল যুগ্মাভাসে ।

ফুটিল রক্ত পদ-কোকনদ আশানের মাঝে কি মস্তুর ?
আশান সে হল কৈলাসপুরী, আশানের পতি মহেশ্বর ।
মন্মথ-জয়ী, মন্মথ বুঝি জয়ী আবার,
কটাক্ষে জাগে কটাক্ষ-হত দুর্নিবার ;
অকিঞ্চনের জাগে কি আবার নব ভিক্ষায় অকিঞ্চন ?
অন্নপূর্ণা ঘরে এল, তাই হল সে ভিখারী চিরন্তন ?

বসন্তসেনা

নমিছে তোমারে বসন্তসেনা নয়নের নির্ঝরে,
হে চারুদন্ত, এ বিপদে আর কে তারে রক্ষা করে ?
বক্ষে উথলে ব্যথার পাথার,
চক্ষে ঘনায় চেতনা-আঁধার,
বেদনা-বিবশ অধরে তবু সে তোমার নামটি ধরে,
তোমার প্রেমের আরতি-আলোক জেগে আছে অন্তরে ।

এসেছিল প্রাতে রাজ-উদ্যানে একা তব অভিসারে,
নিভিল কখনু রূপের রেখাটি মরণের আঁধিয়ারে ;
গত রজনীর আবেগ-আবেশ
তখনো হয়নি বুঝি অবশেষ,
প্রথম সে তার বাসর-শয়ন নবজীবনের পারে
তেয়াগি' কখনু প্রভাতে পশিল মরণ-শয়নাগারে ।

সুখ-রজনীর রজনীগন্ধা প্রভাতে পড়িল ঝরি',
মৌন-ব্যথার সৌরভ-ভারে শঙ্কিত মঞ্জরী ;
একটি রজনী, ভরি' অন্তর
বিলসিল রূপ মধু-মহুর ;
আঁধারের সাথী, প্রাণের নিশীথে তৃষিতের সহচরী,
তমিস্রাতীরে তারার তলুটি, ছায়াপথে মায়াতরী ।

প্রাক্তন

ছ'টি দিন শুধু হল দেখাশুনা,—এল আর গেল চলি',
রেখে গেল শুধু একটি নিশির শিশিরের অঞ্জলি ;
আলোর আড়ালে হয়ে গেল লীন,—
আঁধারের যত ভাষা সীমাহীন
বন্ধের কোন্ অজানা-কক্ষে রেখে গেল কত ছলি' ;
শুধু মুকুলের মুদিত মহিমা আছে আজো উজ্জলি' ।

নামটি তোমার শুনেছিল শুধু, সখীগণ সাথে যবে
বসন্তসেনা হেরিল তোমারে বসন্ত-উৎসবে ;
কাম-আয়তনে অভিনব কাম,
মমতা-মধুর মুরতি স্মৃষ্টাম,—
উজ্জ্বলিত সীমন্তিনীরা কানাকানি করে সবে ;
তুমি দেখ নাহি,—একধারে শুধু আসিয়া দাঁড়াল কবে ।

তুমি এলে তার উদয়-অচলে আশার সরণী বাহি',
তামসী নিশার গ্রহতারাহীন যবনিকা আর নাহি ।
দীপকের রাগ-দীপ্তি অমল,—
নিরঞ্জনার অভিষেক-জল,
রজনীর ফুল রহিল নীরবে বিন্মিত চোখে চাহি' ;
বুকে তার জাগে নূতন স্রবাস সে-কিরণে অবগাহি'

বহু দিবসের জমাট অশ্রু গেল সে-নিমেষে টুটি',
 বহু নিশীথের স্বপ্নের ত্রাস সেই প্রাতে গেল ছুটি' ;
 অজ্ঞার যত বৃকের ভিতর
 হয়ে গেল যেন হীরা ভাস্বর ;
 সারা জীবনের নীলিম লজ্জা লাল হয়ে যেন ফুটি'
 নব-বাসরের ঢেলীর বসনে অন্ধে পড়িল লুটি' ।

তবু আবদ্ধ আবিল জীবন-সরসীর দর্পণে
 কেমনে ধরিবে সোনার ছায়াটি অমুরাগ-অঙ্কনে ?
 হায়, সুদূরের স্বপ্ন অলীক,
 চিরদিন তুমি আশার অধিক ;
 উচ্চে আকাশ, ধুলায় ধরণী,—তড়িতের শিহরণে
 ধরণী বিদরে, দাগ নাহি পড়ে আকাশের প্রাক্ষণে ।

বসন্তসেনা কে না জানে তারে ? অনিন্দ্যশূন্যরী,
 উজ্জয়িনীর বিভ্রমণ সে যে, আনন্দ-মঞ্জরী ;
 বিজ্বলী, রসিকা কাব্যে কলায়,
 চিরবিজয়িনী বিলাস-ছলায় ;
 কত বিদগ্ধ রসিক গুণীরে সুখ-বিষে জর্জরী'
 মদিরাকীর লোল কটাক্ষ দিয়েছে ধন্য করি' ।

প্রাণ নী

কত অধস্ত তবু সে জীবন—আজ তাই প্রাণ দহে ;
সকলের সে যে প্রিয়া, বুঝি তাই কাহারো সে প্রিয়া নহে
তুমি এলে তার প্রাণ-বল্লভ,
তাই আজ তুমি চির-দুর্লভ ;
কণ্টকবনে বৃন্ত যাহার আজন্ম বাঁধা রহে,
অনর্ঘ তোমা' কেমনে সেথায় বরিবে সে আগ্রহে ?

তবু নিশীথের কাঁটার কুসুম হল যেন প্রাতে জাগি'
উর্দ্ধমুখী সে সূর্য্যমুখীটি তপনের দাহ মাগি' ;
দূর হতে শুধু কাস্তি-কিরণ
জীবনের পথে ছড়াল হিরণ,
শুধু দূর হতে ব্যথার অর্ঘ্য ধরে নব অমুরাগী,
নভোবিহারীর কুশালু-তমুর পরশের প্রীতি লাগি' ।

উজ্জয়িনীর উজ্জল মণি, শ্রেষ্ঠীর চক্রে
কে না জানে তব বিপুল বিভব বিলালে যা' অকাতরে ?
কুলে শীলে কেবা তোমার সমান,
প্রথিত পূজ্য তব অবদান ;
সারা নগরীটি তোমার কীর্তি অবিনাশ অক্ষরে
ধরে আছে বুকে বিহারে, আরামে, মন্দিরে, সরোবরে ।

নিঃশেষ আজ রম্য তড়াগ,—তাই সে বর্জ্জনীয় ?
 যে ছিল সবার পরমাত্মীয়, নাই তারি আত্মীয় ;
 বনম্পতিটি পর্ণবিহীন,
 স্নেহের বিহগ হয় না ত লীন ;
 তবু প্রাণ তব চিরক্ষমাশীল, প্রসন্ন, কমনীয়,
 স্নেহরসে সব শোধন করেছে তিষ্ঠ য়া' অপ্রিয় ।

হায় মানবের ভাগ্য-বিধাতা, তব উদাসীন করে
 কুপ-যজ্ঞের ঘটিকার মত কেহ ওঠে, কেহ পড়ে ।
 আলোকে আঁধারে হেরে তাই আঁখি
 জীবনের যাহা সার, যাহা কঁাকি,—
 নাহি অলীকের রহে অভিমান অভিজ্ঞ অন্তরে ;
 অপ্রমত্ত চিত্ত দীপের নিবাত কাস্তি ধরে ।

হে কলা-কোবিদ, কলালক্ষ্মীর স্মৃতিতল হেমঝারি
 ধুয়ে-মুছে দিল জীবন তোমার সব ব্যথা উৎসারি'
 নিম্পৃহ তুমি নহ কোনোদিন,
 যৌবন তব নহে উদাসীন,
 জীবন-রসিক নাগরিক তুমি গুণীগণ-মনোহারী,
 সৃজন জনের ঋণ আদর্শ, কাব্যকাননচারী ।

প্রা ক্ত নী

সেদিন যখন সন্ধ্যা-তিমির আকাশে ঘনায় আসে,
রাজপথ ভরে বিট-কামুকের মস্ত কলোচ্ছ্বাসে,
সহসা কাহার অঞ্চল-বায়
মৈত্রেয়-করে দীপটি নিভায়,—
ভয়বিক্রবা হরিণীর মত চকিতা ব্যাধের দ্রাসে
বসন্তসেনা দাঁড়াল একাকী তোমার ছয়ার-পাশে ।

নৃত্যকলায় চতুর চরণ বিভ্রমে বিস্তাসি’
শঙ্কাহরণ তোমার ছয়ারে শরণ মাগিল আসি’ ;
অপটু জনের স্পর্শে কাতর
বীণা-তার যেন কাঁপে থরথর ;
পড়ে খসি’ খসি’ কনকের হার, অলকের ফুলরাশি ;
নয়নের নীলে, অধরের কূলে মিলাইয়া যায় হাসি ।

দাসী ভাবি’ যবে প্রাবারক তব দিলে আসি’ তার করে,
গুণ-নির্জিজ্ঞতা দাসী সে তোমার হল চিরদিনতরে ;
জাতী-কুসুমের স্নিগ্ধ সুবাস
ভরে ছিল সেই অঙ্গের বাস,
কি-যেন-কিসের নেশায় তাহার হৃদয় আকুল করে,—
দুরাশা-ভয়ের দিগ্‌বলয়ের শিরে কি জ্যোত্স্না ঝরে ?

সেদিন স্তিমিত প্রদীপের তলে হেরিলে সে-মুখখানি,
 দৌহে ছাড়া আর কেহ নাহি জানে কি যে হল জানাজানি ;
 অলক্ষ্য কোন্ স্থলের চেতনা
 জাগাল কি নব হৃথের বেদনা ;
 সকলের সাথে একেলা-যাওয়ার পথে, কে করুণা মানি'
 আঁধারের কূলে বাহিত যাহা এতদিনে দিল আনি' ।

বসন্তসেনা এই সেই ? যারে সকল রসিকজনা
 তপাসি' তপাসি' হয়েছে অধীর-হুঁরাশায় হৃদ্যনা ;
 হৃদয়ের যত বাসনা নূতন
 মিলায় ভীকুর ক্রোধের মতন,—
 নিঃশ্ব প্রেমের কি আছে, কি দিয়ে রচিবে পূজার্চনা ?
 নহে নির্ভয় বিজয়, হায় রে প্রেমের প্রবঞ্চনা !

বহু-প্রকোষ্ঠ হৃদ্য তাহার রাজার পুরীর মত,
 বিভব-বিহীন বাসনা সেখানে চিরদিন প্রতিহত ;
 জান না কি তবু—আলানে দ্বিরদ,
 বল্গায় ধরে বাজি হৃদ্যদ ?
 নারী ধরা পড়ে হৃদয়ের জালে,—বৃথা নিঃশ্বাস যত ;
 নিঃশ্বের গৃহে বিশ্বের প্রীতি হয়েছে শরণাগত ।

প্রাক্তন

সহসা সেদিন দূর হতে যেন সেই নিঃশ্বাসভরে
প্রাসাদে তাহার রূঢ় দীপমালা নিভে গেল চিরতরে ;
ধামিল নূপুর প্রমোদ-নিশির,
মুরঞ্জের রব স্নিগ্ধ নিবিড় ;
দ্বিরদ-দন্তে অবলম্বিত বীণা নাহি গুঞ্জরে,
মুক্তার হার ছলিল না আর উরসের পরিসরে !

নন্দনবন-সম তার সেই আনন্দ-উপবনে
গৃহ-শিখী আর নাচিল না তার বলয়ের নিকণে ;
পিঞ্জর-শুক কাঁদে চারিভিতে,
কপোত সুপ্ত গৃহ-বলভীতে ;
সুস্নেহ-তোমার দ্বন্দ্ব-পরিচিত বস্ত্রের বাতায়নে
কজ্জলহীন-উজ্জল-অঙ্গি-বলে আছে আনন্ডনে ।

রুদ্ধ হয়েছে কনক-কপাট গজদন্তের দ্বারে,
শূন্য আসন, সুরভি আসব নাহি ত কনকাধারে
নাহি বর্ণিকা সিক্ত-ফলক,
দেহে নাহি আর হীরার ঝলক ;
ধূষ্ট মেখলা নাচিল না আর,—শৃঙ্গার-ভঞ্চারে
হরষ-বিষের কলঙ্ক-রস জাগল না আর তারে ।

তুমি ত এলে না, তাই সে একেলা তব অভিসারে চলে,
বরষা সেদিন নেমেছে নিবিড় তিমির-গগন-তলে ;

হৃদয়ের মত আকুল আকাশ,
ঝরে জলধারা, পড়ে নিঃশ্বাস ;

চপলা চপল ছরাশার মত ধাঁধিয়া আঁধারে ছলে,
কেবল প্রাণের প্রীতিটি পথের প্রদীপের মত জ্বলে ।

পণ্যরমণী পথের লতা সে, বৃকে তারে তুলে নিলে,
কত সুনিবিড় সোহাগের রসে সযতনে জিয়াইলে ;

সঙ্ক্যামেঘের মত ক্ষণরাগ

বারবধু সে ত, আঁধারের দাগ

কত ঘন হয়ে বৃকের ভিতরে জমেছিল তিলে-তিলে,
সেথা স্বাক্ষর অনলাক্ষরে অঙ্কিত করে দিলে ।

শ্মশান-বীথির ব্যথার কুসুম, রৌদ্র-দহনে জাগি'
ছিল সারাদিন একটু শীতল শিশিরের কণা মাগি' ;

যে-প্রেম করেছে জীবনের জয়

শ্মশানের ফুল সেই বৃকে লয় ;

ভস্মের টীকা নিঃস্ব ললাটে ধরেছে যে-অমুরাগী,
তাহারি কণ্ঠে উজ্জলে গরল,—সুখা নহে তার লাগি' ।

প্রাণ নী

অসহায় বৃকে অনাথ বাসনা কত গুমরিয়া মরে,
একটু সহজ স্নেহের লাগিয়া প্রাণ আছাড়িয়া পড়ে ;
কোথা তৃষায় তৃপ্তির জল,
লবণের নীর ঘিরেছে অভল,—
পীযুষ-পাত্র লয়ে করে তুমি বৃক্ষি মন্থস্তরে
ধন্থস্তরি, উদিলে তাহার হৃৎ-সাগর 'পরে ।

গলদক্ষর পরম প্রবাহে প্রীতি-অভিষেক করি'
নব স্নেহে ভরি' প্রাণের প্রদীপ প্রাণনাথে নিল বরি' ;
পরশে সরস চন্দন ঢালা,
বাহু দু'টি যেন বন্দন-মালা ;
সৌরভভরা গৌরব-ভারে বৃকে আকুলিয়া ঝরি',
নিঙাড়ি' নিভৃত মন্দির-মদিরা ধরিল অধর ভরি' ।

অনেকে এসেছে, অনেকে গিয়েছে,—আজ বৃক্ষি তাই একা
ক্ষুরধারসম দুর্গম পথে তোমা' সনে হল দেখা ;
প্রাণের অর্থ্য কেহ ত জানেনি,
কি ছিল তাহার কেহ ত জানেনি,
মধুমাসে তারা মধু-লম্পট শোনে শুধু কুহ-কেকা ;
তুমি পেলো তাই আবিণ-ধারায় সঞ্চিত মধু-লেখা ।

মস্ত মেঘের নিবিড় আসার ঘিরে আসে চারিধারে,
 বৃহৎ ভুবন ক্ষুজ্র হয়েছে সঘন অন্ধকারে ;
 উত্তরোল আজ আর্জ পবন,
 দীপ নিভে যায়, রুদ্ধ ভবন,—
 শুধু ছ'টি প্রাণে জেগেছে বেদন, আধারের পারাবারে
 দেহের সীমায় এ'-উহারে ধরে সুখ-দুখ-একাকারে ।

আবেগ-আকুল বাহুপাশে তারে রাগের রক্তসে ধরি',
 অধর উরস পদ-পঙ্কজ চুষনে দিলে ভরি' ;
 নবলাজসম হাসির মুকুল
 হল নিরুপম দেহের হুকুল ;
 অবগুষ্ঠনহীন জীবনে যৌবনে সম্বরি',
 নব প্রীতি আজ প্রাণের জরারে হ'রে নিল সঞ্চরি' ।

দুঃখ পুড়িল সুখ-নিঃশ্বাসে, অনঙ্গ-শিহরণে
 ভরিল অঙ্গ, মূরছিল সুখ দুঃখের স্পন্দনে ;
 হয়ে দিশাহারা জাগে বিস্ময়—
 এ কি স্বপ্নের কায়া মায়াময় ?
 মাধুরী-মদিরা করে মাতোয়ারা নিছত্তের নিবেদনে
 আঁধার-আবেগে ছ'টি দেহ-তটে প্রাণের বিপ্লাবনে ।

প্রাঙ্গণ

লভি' প্রতিষ্ঠা পরম, আর্থ্য চারুদত্তের ঘরে
বক্ষিতা নারী নারী হয়ে জাগে আজ এতদিন পরে ;
পরশের রসে প্রাণের আরাম,—
বার-বার তোমা' করে সে প্রণাম ;
প্রভাতে হেরিল নব বিশ্বয়ে—আলোকের নির্ঝরে
চরণে প্রথিত পৃথ্বী, আকাশ আল্পেষে তারে ধরে ।

আসার-ধৌত রজনী গিয়েছে, আলোক-সিনান করি'
ফুটিল প্রভাত, সাথে সাথে তার এ কি আজ, মরি, মরি,
কার শিশু-মুখ বাপের মতন
—স্নেহ-সাগরের মন্থন-ধন—
ভাসিল নয়নে, নূতন বেদনে সারা প্রাণ হাহা করি'
একবার চাহে বুকে জড়াইতে বুভুক্ষু বুক ভরি' ।

সিক্তপল্ল চক্ষু ঢেকেছে কজ্জল-কালো কেশে,
লীলায়িত করি' বাহু দাঁড়াইল বসন্তসেনা হেসে ;
একবার ওরে আয়, বুকে আয়—
তবু সে এল না, ফিরিয়া দাঁড়ায়,
জননী ত তার পরে না সোনার কঙ্কণ বাহুদেশে ;— ;
প্রসারিত বাহু নিমেষে নমিত, চোখ গেল জলে ভেসে

নিঃস্ব শিশুর জননী হবে সে হিরণ্য-গর্বিণী ?
 খ'সে প'ড়ে গেল একে-একে সব কঙ্কণ কিঙ্কণী !
 মুগ্ধ মুখের কথাটি মধুর
 বুকে আসি' বাজে কত নিষ্ঠুর,—
 ভরিল শিশুর মৃৎ-শকটিকা আভরণ-তেয়্যাগিনী,
 হল ভিখারীর দয়িতা সেদিন স্বেচ্ছায় ভিখারিণী ।

সেই আভরণ-হরণ লাগিয়া তুমি আজ অপরাধী,
 এ কি পরিহাস, রাজার দুয়ারে তোমারে এনেছে বাঁধি' ;
 চপলা ঋণিক কাস্তি বিলায়
 চমকি' আঁধার-মরণে মিলায়,
 পিছনে তাহার কাস্ত জলদ ঝরে বুঝি কাঁদি' কাঁদি',
 তা'রি বিলয়ের ত্রুর অপবাদ আসে শুধু আচ্ছাদি' ।

একটি রজনী শ্রাবণ-যুথিকা ছলিল তোমার গলে,
 আনিল সুরভি সুরার মতন চেতন হৃদয়তলে ;
 প্রাণের পরম পরিমল যার
 হল বিকশিত পরশে তোমার,
 তুমিই তাহারে দলেছ চরণে,—এ কি আজ এরা বলে ?
 যে-কুসুম রহে বৃকের উপর, কে তারে চরণে দলে ?

প্রাক্তন

সে-নিশীথ বুঝি নিমেষের মত কেটেছিল অজ্ঞাতে,
কত কথা ছিল বাকী, তাই তারে আসিতে বলিলে প্রাতে ;
অদৃষ্ট আসি' ঘটাল প্রমাদ,
মিলাইয়া গেল মিলনের সাধ ;
সোহাগের পাখী একেলা কখন লুটাল সে নিরালাতে,—
কেন ব্যাধ-শর ক্রৌঞ্চ-মিথুনে বিঁধিল না একসাথে ?

ছিল তার এই অপরাধ শুধু—তোমারে সে ভালবাসে ;
কুলনারী সম স্পর্ধা তাহার—বার-বিলাসিনী না সে ?
ভিখারী যে, তারি লাগি' বহুমান ?
রাজশ্যালকের করে অপমান ;
মুখে নিঃশ্বের নিষ্ফল নাম আজো লয় উচ্ছ্বাসে
আশ্বাসহীন মরণের তটে শরণের আশ্বাসে !

কানে বাজে কত ক্রুর বিজ্রপ, তবু হাসিমুখে কহে-
চারুদত্তের প্রণয়িনী, এ তো নিন্দার কথা নহে !
এযে গুণগান, গর্ব তাহার,
জুড়াল জীবন গুনি' বার-বার ;
বন্ধে শ্রীতির প্রদীপ্ত মণি সব অভিমান দহে,
চক্ষে চরণ-ছ'টি মরণেও চির-জাগরুক রহে ।

দোষী নহে, শুধু প্রেমে দোষী হয়ে, নিষ্ঠুর প্রেমানলে
অনর্থ যেন বেদনা-সমিধ্ উজ্জল হয়ে জলে ;

নিজের জয়-অরণি-দাহক

প্রাণ-যজ্ঞের পুরোধা পাবক,

তারি দহনের জয়-অঙ্কনে শ্রীতি-পুত পরিমলে
স্মৃতি-ধুমধূপে কুষ্ঠাবিহীন প্রাণ-হবি উচ্ছলে !

মৃত্যু আসিয়া কণ্ঠ রোধিল, তবু কাকূতির স্বরে
কাঁদে না ফুকারি', জীবনের ভয়ে ভিক্ষা সে নাহি করে ;

ভাসে শুধু তব বদন-কমল

আঁখির নীরব নিঝরে অমল,

শুধু সে তোমারে, হে চারুদত্ত, নমিয়া নমিয়া স্বরে ;
তব নাম জপি' বসন্তসেনা মৃত্যুরে নাহি ডরে ।

মরণের মহালগ্নে জেগেছে মরণবিহীন প্রেমে
দেবতার মুখ ভরি' সারা বুক,—ধুক্-ধুক্ গেছে থেমে ;

তুমি দেখায়েছ অমৃতের পথ,

মৃত্যু কেমনে রোধে মনোরথ ?

যে-মাধুরী ধরি' জাগরের মাঝে একদিন এলে নেমে,
দাঁড়ায়েছ আজ স্মৃতির পথে সেই অনাবিল ক্ষেমে ।

প্রা ক্ত নী

কে জানে কখন মুদি' আঁখিপাতা লুটাল সে ধরাতলে,
কখন পবন আসিয়া অশ্রু মুছাল স্নেহের ছলে ;

কে জানে কখন একরাশি ফুল
মাথার উপর ছড়ায় বকুল,
একখানি ছায়া বিছাইয়া দেয় নব-পল্লব-দলে ;
প্রভাত-কিরণ সীঁথিতে প্রীতির সিঁদূরের মত অলে !

মহাপ্রভা

দেখিল কারে মহাশ্বেতা অচ্ছাদের কূলে,
পড়িল কার অঙ্কমালা আসিয়া পদমূলে ?
কে আসি' কানে পরাল পারিজাত,
মৃণালসম ললিত-মৃদু কাহার ছ'টি হাত ?

শুভ্রবেশ আর্জকেশ, অঙ্কমালা হাতে,
তাপস-যুবা পুণ্ডরীক আসিল কেন প্রাতে ?
আনিল কেন ত্রিদিব-ফুল-মালা ?—
নিমেষহীন নয়নে চেয়ে রহিল রাজবালা ।

মকরকেতু ধনুক-বাণ নিভৃতে লয়ে করে
সেদিন বুঝি ভ্রমিতেছিল বনের অন্তরে,
চাহিয়া শুধু দেখিল হাসিমুখে,—
পাগল-করা পুষ্পশর বিঁধিল ছ'টি বুকে ।

তরুণ ঋষি অঙ্কমালা ভুলিয়া গিয়া, পরে
ফিরিয়া আসি' চাহিল যবে, বেপথুভরা করে
মুক্তামালা কণ্ঠ হতে খুলে
অঙ্কমালা রাখিয়া গলে বালা সে দিল ভুলে ।

প্রাক্তন

ফুলের শর দৃষ্টিসাথে দৃষ্টি বুঝি গাঁথে,
করের সেই অক্ষমালা বক্ষ-মালা সাথে ;
হিয়ার সাথে হিয়ার বিনিময়,
বনের পথে মনের রথে হল সে পরিণয় ।

সহসা নব কলিকা যেন পাপড়ি মেলি' ফুটে,
নূতন-জাগা রবির করে পরশ-ধারা লুটে,
দৌহার পানে চাহিয়া দৌহে রহে,
ভুবন ভরি' নূতন করি' বাতাস যেন বহে ।

রাজার বালা চলিয়া গেল, তাপস আনুমনে
নূতন সুখে, নূতন দুখে ফিরিল তপোবনে ;
নাহি ত সুখ তপের দুখ-দাহে,
প্রেমের সুখ-দহনে তাই হৃদয় দুখ চাহে ?

দীপ্তিলীন আঁখিটি আনে তৃপ্তিহীন তৃষা,
নামের জপ ভুলাল তপ, হারায়ে গেল দিশা ;
তাপস ভাবে ভাসিয়া আঁখিজলে—
এ যদি হয় গরল, তবে অমৃত কারে বলে ?

মরণ-পরে শূন্য কোন্ স্বর্গ-অভিলাষী
 জীবন কেন ধরার স্মৃতি-উপবাসী ?
 থাক্ না দূরে আঁধার-যবনিকা,
 ভুবন ভরি' অলিছে তবু রূপের দীপ-শিখা ।

পরশ তাই সরস করে সকল দেহ-মন,
 জাগিছে আঁখি সতত মাগি' আঁখির দরশন ;
 বাহুটি চায় বাঁধিতে বাহুটিরে,
 একটু শুধু মমতা লাগি' হৃদয় কেঁদে ফিরে ।

আবার কোন্ স্মৃতির ধ্যানে নয়ন তাই জাগে,
 হৃদয় জাগে আবার কোন্ চুখের তপোরাগে ;
 শিথিল করি' প্রাণের গ্রন্থিরে
 দেহের লাগি' দেহের সব বাঁধন গেল ছিঁড়ে ।

শীর্ণ তম্বু শীর্ণ আরো, জীবন আশাহীন
 কাটে না আর, মৃত্যু তাই আসিল একদিন ;
 অমৃতসম গরলধারা তারে
 করিল মৃত, গরলসম অমৃত-অধিকারে ।

প্রা ক্ত নী

চন্দ্রালোকে সৌধতলে থামিয়া গেল বীণা,
তন্ত্রীহারা বৃকের'পরে লুটাল গীতহীনা ;
ছুটিয়া আসি' অচ্ছাদের তীরে
লুটাল রাজকুমারী আজ ধূলায় আঁখিনীরে ।

প্লাবিত ছ'টি নয়ন তুলি' দেখিল রাজবালা
কণ্ঠে আজো রয়েছে সেই তাহারি দেওয়া মালা ;
ঝাঁপিয়া বৃকে, ব্যাকুল বাহু দিয়া
বেড়িয়া সেই কণ্ঠ তার পড়িল মূরছিয়া ।

প্রভাতে ক্ষণমিলন-পরে বিচ্ছেদের তীরে
আঁধারে ছ'টি চক্রবাক দৌহারে খুঁজে ফিরে,
হৃদয়ে শুধু জালিয়া আশা-বাতি—
আবার কবে প্রভাত হবে, কাটিবে দুখ-রাতি ;

মৃত্যু-শর বিঁধিল আসি' তাহারি একটিরে
প্রভাত নাহি ফুটিল আর উদয়-গিরি-শিরে ;
বিরহ-নিশা দীর্ঘতর করি'
নামিল আসি' অন্তহীন মরণ-বিভাবরী !

যেখানে তার চোখের আলো হয়েছে অপকৃত,
 যেখানে তার প্রাণের স্মৃতি হয়েছে চির-মৃত,
 মহাখেতা জাগিল সেখা একা,
 যেখানে আজো রয়েছে আঁকা প্রিয়ের পদ-রেখা ।

বাঁধিয়া দীন কুটার সেই অচ্ছাদের তীরে
 পূজার ফুল তুলিয়া নিতি পূজিত স্মৃতিটিরে ;
 মরণ-ভূমি তীর্থ হল তার,
 তাপস-প্রিয়া তাপসী হল, নয়নে জলভার ।

কণেকতরে দেখিয়া যারে নয়ন নাহি ভরে
 সে-রূপ বুঝি নয়ন আজ হারাল চিরতরে ;
 হারাল সেই পরশ তনু-মন
 আনিল যাহা কণেক কবে নীপের শিহরণ ।

সে-দেহ, হায়, একটি দিন বাঁধেনি সে ত বুকে,
 চকিতে শুধু হেরিল কবে হাসিটি সেই মুখে ;
 ভুবনে বুঝি তুলনা তার নাহি
 কণেকতরে যে-মুখ কোটে মুখের পানে চাহি' ।

মনের সব মমতা আজ মনের লাগি' কাঁদে,
ধরার রূপ-পরিধি-মাঝে কেমনে তারে বাঁধে ?
কখনো আর জীবন-ছায়ালোকে
একটি সেই মুরতি-মায়া পড়িবে না কি চোখে ?

দিনের পর কাটিল দিন বিরহ-তপোবনে,
হারান মুখ একেলা বালা ধেয়াল দেহে-মনে ;
দিনের পর কাটিয়া যায় দিন,
বুকের মাঝে আকাশ-চাওয়া আশাটি নহে ক্ষীণ

প্রভাতে আসি' পূর্বতটে পাণ্ডুমেঘে হারা
ফুটিয়া রয় ধরণীপানে শীর্ণ শুকতারা ;
অস্তমেঘে দিনের চিতা জ্বলে,
সন্ধ্যাবধু মলিন-মুখে দাঁড়ায় আঁখিজলে ।

নিদাঘ-দাহ কখন আসে, লুটায় ঝরা-ফুল,
দীর্ঘ দিন, নীরস নিশা, হৃদয় তুষাকুল ;
বরষা আসে, নিবিড় ধারা ঝরে,
সজল বায়ে শ্রামল-ছায়া মেঘের মায়া ভরে ;

উদাস করে রুচির ধরা শরতে সারা বেলা,
 স্বচ্ছ নভে জ্যোৎস্নাসাথে অলস মেঘ-খেলা ;
 আকুলি' আসে শিশির-কুহেলিকা,
 কানন-পথে স্রবাসে ঝরে নিশির শেফালিকা ;

ধূসর বন শিহরে শীতে, ডাকে না আর পিক,
 দীর্ঘ নিশা কাটে না আর, কুয়াসা ভরে দিক ;
 আলোকে আসে পুলকে মধুমাস,
 মলয় মুহু আবার আসি' ফুটায় ফুল-হাস ;

আসে না সে ত যাহার তরে জাগিছে দেহ-মন,
 উজ্জল আকৌ যাহার রূপে স্মৃতির নিকেতন ;
 একেলা শুধু মৃত্যুজয়ী প্রেম
 বিরহানলে পুড়িয়া জলে নিকষ-কষা হেম ।

কেমনে তারে ভুলিবে আজ, যাহার সাথে চির
 জনম হতে জনম আছে বাঁধন কত দৃঢ় ;
 রয়েছে শুধু চোখের অগোচরে
 চোখের তারা নিয়েছে যারে আঁকিয়া চিরতরে ।

প্রাণ নী

প্রাণের মাঝে জাগিছে, তবু দিবে না কড় ধরা

বাহুর পাশে মূর্তিখানি মাধুরী দিয়ে গড়া ?

দেহের তরে দেহটি রয়ে জাগি',—

কে চাহে শুধু ধ্যানের সুখা প্রাণের ক্ষুধা লাগি' ?

অরূপ প্রেম রূপের দ্বারে স্মৃতির মন্দিরে

বারেক চাহে বুকের নিধি বুকের মাঝে ফিরে ;

জীবন আজ মরণে লবে জিনি',

তাপসী তাই অশ্রুজলে জাগিছে একাকিনী ।

পত্রলেখা

তুমি ত দেখনি কত সে আপন মনের মাধুরী ঢাকিয়াছে,
হে চন্দ্রাপীড়, তন্দ্রা-নিবিড় নিভৃতে তোমারে ডাকিয়াছে ;
দাঁড়ালে কখন আড়ালে প্রাণের শতদলে,
দূর হতে তার আশা বার-বার লুটায়েছে আসি' পদতলে ।

হল তাম্বুল-করকপুট-বাহিনী রাজার নন্দিনী,
দিবস-রাতির সখীটি তাহারে করিলে যে ছিল বন্দিনী ;
তবু কি অশ্রু অলক্ষ্যে ঝরে কলহাসে ?
সুখের দুখের সখীটি, তবুও কখনো বুকের হল না সে ?

ছিল উন্মনা নবযৌবনা নব মধুমাস-মঞ্জরী,
প্রাণের প্রাস্তে ছিল একান্তে কত শ্রীতি-গীতি সঞ্চরি' ;
তব্বী-তম্বুর বহি-বরণে নিকষিত
স্নেহের সোনাটি দেহের লীলার লাবণ্যে ছিল বিকশিত

ভাগ্য তোমার যেদিন তাহার মূরতি আঁখিতে দিল আঁকি',
মুখখানি তার প্রথম সেদিন শ্রীতি-অমলিন ছিল না কি ?
ঝরেনি হাসিটি, করেনি তোমারে বিন্মিত ?
কালো আঁখিতারা ছিল কথাহারা সেদিন আত্মবিস্মৃত ?

প্রা ক্ত নী

কবরী-আঁধার-আবরিত তার আয়ত আখির আলো এসে
ধরেনি ঘেরিয়া আকুল করিয়া দেহটি তোমার ভালবেসে ?
ক্ষীণ কটিতে কনক-মেখলা-কিষ্কিণী
মৌন-বিলীন ছিল কি সেদিন, শোননি কি তার রিন্ঝিনি ?

মণি-নূপুরের ঋণিত সেদিন করেনি ধ্বনিত কানে-কানে
কুণ্ঠিত কলতানের অতলে যে-গীত উথলে প্রাণে-প্রাণে ?
নব-মুকুলিত নিভৃত বৃকের কূলে-কূলে
মুক্তার হার নিঃশ্বাসে তার ওঠেনি সেদিন ছলে ছলে ?

তারপর গেছে কত নিশিদিন বিরামবিহীন হ্রাসি-গানে,
তাহার কণ্ঠ-কাকলি আকুলি' বাজেনি কখনো আসি' প্রাণে ?
কাঁকনের সুর ঝরেনি মধুর ঝঙ্কারে
দিবস-রজনী মন রণরণি' মদনের ধনু-টঙ্কারে ?

অঞ্চল হ'তে চঞ্চল স্রোতে ভরেনি গঙ্গভার প্রাণে ?
নয়নের কোণে অশ্রুমনে কি চাহনি কখনো তার পানে ?
থামেনি তোমার বাঁশীটি কখনো গীতিহারী ?
করেনি উদাসী অধরের হাসি বিজন-ব্যথার শ্রীতিহারী ?

জ্যোৎস্না-চিকণ অবগুষ্ঠন খুলে সে কখন মনোভুলে
 নির্জন সাঁঝে নিকুঞ্জমাঝে বিনাইত বেগী বনফুলে ;
 সহসা সেখানে আসি' আনমনে চমকিয়া ?
 মুখপানে তার ক্ষণকাল চেয়ে দাঁড়ায়েছ কভু ধমকিয়া ?

চন্দ্র-মধুর মধু-রঞ্জনীর আবেশে আকুল বেশ-বাসে
 সুরভি পবনে একা বাতায়নে বসিত শ্রুত-কেশপাশে ;
 বুকে কি তখন পত্রলিখন ছিল আঁকা ?
 বুঝি নিরমল যুগ্ম-কমল নীল-অঞ্চল দিল ঢাকা ?

সে ত চলে যেত চকিতের মত কখন আপনা' সম্বরি',
 লুপ্তিত বাস গুপ্তিত করি' কুপ্তিত-পদে সঞ্চরি' ;
 মাধবীমাসের মায়া-নিশীথের ছায়ালোকে
 পড়েনি মুদিত শ্রীতি-সমুদিত কমনীয় সেই কায়া চোখে ?

বিজয়-যাত্রা করিলে যাত্রা-সহচরী তারে সাথে করি',
 প্রয়াণের পথে আপনার রথে তুলে নিলে তারে হাতে ধরি' ;
 গরবী গ্রীবাটি বাঁকায়ে, হাসির রাগ মেখে
 ফিরিত মুখটি বার-বার,—তার গিয়েছে কি কোনো দাগ রেখে ?

প্রাঙ্গণ

সমুখে বসাতে তুরগে যখন কটিতট তার ধরি' করে,
উড়িত অলক, পড়িত এলায়ে দেহটি দেহের পরিসরে ;
কেশের সুবাস করেনি উদাস মনটিরে ?
করেনি তাহার সেই দেহভার শিথিল প্রাণের গ্রস্থিরে ?

যখন নিশার সুপ্তি-সাগরে চাহে চরাচর লুটিবারে,
একই গৃহে দৌহে মুদিতে নয়ন পাতিয়া শয়ন ছু'টি ধারে ;
ভেদিয়া আঁধার আর নাহি তার আঁখি ভাসে,
কোথা একপাশে লজ্জার বাসে রহে আপনারে ঢাকিয়া সে ;

ঝরিত কখন জ্যোৎস্নার আলো কালো কেশপাশে বিহরিয়া,
আঁচলটি তার নিশীথ-অনিল করিত শিথিল শিহরিয়া ;
শিয়র-শিথানে কেশের কুসুম যতগুলি
লুটিত, উঠিত বুকের স্পন্দ বসন-বন্ধে কত ছলি' ;

দেখেছ তখন অর্ধরাত্রে জাগি' ঘুমন্ত ছু'টি আঁখি ?
দেহের সুবাস ঝরিত, পড়িত মিনতির মত লুটিয়া কি ?
মধুর অধরে আধ-বিকশিত স্নিত-রেখা,
স্বপ্নলোকের খেলা কি চোখের কোরক-কিনারে দিত দেখা ?

যখন বরষা ঘন-বরষণে নামিত আবেণে সারারাত্তি,
চপলা-চমকে মেঘের ধমকে আকাশে বাতাসে মাতামাতি,
ভয়-বিহ্বল তাহারে কাছে কি লহ ডাকি' ?
কণ্ঠ তোমার আধ-ঘুমঘোরে বাঁধে বাহুডোরে সহসা কি ?

যুথী-কদম্ব-কেতকীর বাসে ব্যথিত বাতাসে নিশা সারা
দীপহীন ঘরে ঘুমহারা ছুঁটি হৃদয় হয়নি দিশাহারা ?
কাঁপেনি বন্ধ মেঘ-গরজন-গৌরবে
গ্রহতারাহীন-আঁধার-বিলীন বাদল-উতল সৌরভে ?

ছিল সে আপন ছায়ার মতন জড়িয়ে সুপ্তি-জাগরণে,
বেপথু-ব্যাকুল তবু নিরাকুল স্নিগ্ধ সেবার আবরণে ;
নিবিড় সহজ অলঙ্কার ছিলে ছিল কাঁপি',
তব অন্তর-অন্তরীক্ষ পবনের মত দিল ব্যাপি'।

যতনে তোমার কণ্ঠের হার কতদিন কত ফুল তুলি'
গেঁথেছে বিরলে সন্ধ্যার তলে বসিয়া এলায়ে চুলগুলি ;
রাজ-বালিকার ফুল-মালিকার অন্তরে
দেখনি কি-গাথা ছিল বুঝি গাঁথা কাম্য কামের মস্তুরে ?

প্রাঙ্গণ

যে-মূর্তি তার কুমারী-হৃদয়ে ছিল নিরালার কল্পনায়,
বসায়েছে যারে ধ্যানের আসনে আশা-নিরাশার আলনায়,
সে-মূর্তি ধরি' প্রাণ-পুলকের স্পন্দনে
তুমি এলে তার জীবনের মাঝে নব বেদনার বন্দনে ।

বন্ধ-কারায় লক্ষ ধারায় বারিত যে সুধা-অঞ্জলি,
'ভাঙি' মর্মের মর্মর-গিরি ওঠেনি কভু তা' চঞ্চলি' ;
সেই অনাবিল বাসনা-সলিল বুকে ভরি'
বহিয়াছে মৃদু কলতানে শুধু, ছুখের হাসিটি মুখে ধরি' ।

অশ্রুসজ্জল উজ্জল আঁখিটি দেখনি, নাওনি তুলে বুকে :
মরমী ছিল সে, তবুও সোহাগে চাওনি কখনো ভুলে মুখে ;
সে রহিল শুধু স্নেহের সীমার সঙ্গিনী,
আর এক জন হল সে কখন্ তোমার অন্তরঙ্গিনী ।

প্রীতির পরশ জাগাল যেদিন আপনা-বিলীন উদাসীরে,
বন্ধুটি, হায়, কোথা ভেসে যায় সেদিন সুখের সুধানীরে ;
তোমারি লাগিয়া আপনার আশা দলি' বুকে
তব সন্দেশ-বাহিনী হল সে, তব সুখতরে চলি' সুখে ।

উচ্ছল নব রস-পরিহাসে, ক্লগকাল তব অবকাশে
 দেখেছ কি তার চোখে জলভার, বসিয়েছ তারে তব পাশে ?
 ছায়াটি পিছনে রহে, ফিরে দেখে কেই বা তা' ?
 আড়ালে আঁধারে কে খুঁজিবে তারে, কে বুঝিবে তার সেই ব্যথা ।

ছিল বুকে তার ধ্যান-নিমগ্ন অমায়ামিনীর যত ভাষা,
 ছিল বুকে তার অমায়ামিনীর বিজ্ঞান বিপুল কত আশা ;
 বাজিল প্রভাতে করুণ কণ্ঠে ভৈরবী,
 আঁধারের পারে প্রাণের কিনারে উদয়-ছয়ায় কৈ রবি ?

অর্ঘ্যটি ধরি' স্বর্গের মাঝে সুধাতরে ছিল ক্ষুধালীনা,
 প্রেম-মন্দিরে মন্ত্রবিহীন ছিল উপাসিকা উদাসীনা ;
 তারে ফেলে রেখে চলে গেলে তুমি কোন্ দূরে,—
 পড়েছে কি মনে কখনো পুরানো জীবনে-জড়ানো বন্ধুরে ?

এই লেখকের—

দীপালি

সীলান্বিতা

অদ্যতনী (বয়স)

অপরাজিতা (বয়স)

